

目錄

佛說觀彌勒菩薩上生兜率天經	一
佛說彌勒下生經（竺法護譯）	一七
佛說彌勒下生成佛經（鳩摩羅什譯）	三三
佛說彌勒下生成佛經（義淨譯）	四七
佛說彌勒大成佛經（鳩摩羅什譯）	六五
佛說彌勒來時經	一〇三
大寶積經彌勒菩薩所問會	一〇九
一切智光明仙人慈心因緣不食肉經	一三五
賢愚因緣經波婆離品	一四五
佛說彌勒菩薩發願王偈	一七五

附錄

目錄

大阿羅漢難提蜜多羅所說法住記	一八一
婆藪槃豆法師傳	一九五

佛說觀彌勒菩薩上生兜率天經

劉宋居士沮渠京聲譯

如是我聞，一時佛在舍衛國，祇樹給孤獨園。

爾時世尊，於初夜分舉身放光，其光金色，遶祇陀園周遍七匝，照須達舍亦作金色。有金色光猶如霞雲，遍舍衛國，處處皆雨金色蓮花。其光明中，有無量百千諸大化佛，皆唱是言：「今於此中有千菩薩，最初成佛名拘留孫，最後成佛名曰樓至。」

說是語已。尊者阿若憍陳如即從禪起，與其眷屬二百五十人俱。尊者摩訶迦葉，與其眷屬二百五十人俱。尊者大目犍連，與其眷屬二百五十人俱。尊者舍利弗，與其眷屬二百五十人俱。摩訶波闍波提比丘尼，與其眷屬千比丘

尼俱。須達長者，與三千優婆塞俱。毘舍佉母，與二千優婆夷俱。復有菩薩摩訶薩，名跋陀婆羅，與其眷屬十六菩薩俱。文殊師利法王子，與其眷屬五百菩薩俱。天、龍、夜叉、乾闥婆等，一切大眾覩佛光明，皆悉雲集。

爾時世尊出廣長舌相，放千光明，一一光明各有千色，一一色中有無量化佛，是諸化佛異口同音，皆說清淨諸大菩薩甚深不可思議諸陀羅尼法。所謂阿難陀目佉陀羅尼、空慧陀羅尼、無礙性陀羅尼、大解脫無相陀羅尼。

爾時世尊以一音聲，說百億陀羅尼門。說此陀羅尼已，爾時會中有一菩薩，名曰彌勒，聞佛所說，應時即得百萬億陀羅尼門。即從座起，整衣服，叉手合掌，住立佛前。

爾時優波離亦從座起，頭面作禮，而白佛言：「世尊！世尊往昔於毘尼中及諸經藏，說阿逸多次當作佛。此阿逸多具凡夫身，未斷諸漏。此人命終當生何處？其人今者雖復出家，不修禪定，不斷煩惱，佛記此人成佛無疑，此人命終生何國土？」

佛告優波離：「諦聽諦聽，善思念之。如來應正遍知，今於此眾，說彌勒菩薩摩訶薩阿耨多羅三藐三菩提記。此人從今十二年後命終，必得往生兜率陀天上。

爾時兜率陀天上，有五百萬億天子，一一天子皆修甚深檀波羅蜜，為供養一生補處菩薩故，以天福力造作宮殿。各各脫身栴檀摩尼寶冠，長跪合掌，發是願言：『我今持此無價寶珠及以天冠，為供養大心眾生故。此人來世

不久，當成阿耨多羅三藐三菩提，我於彼佛莊嚴國界得受記者，令我寶冠化成供具。』如是諸天子等各各長跪，發弘誓願，亦復如是。

時諸天子作是願已，是諸寶冠化作五百萬億寶宮，一寶宮有七重垣，一一垣七寶所成，一一寶出五百億光明，一一光明中有五百億蓮華，一一蓮華化作五百億七寶行樹，一一樹葉有五百億寶色，一一寶色有五百億閻浮檀金光，一一閻浮檀金光中，出五百億諸天寶女，一一寶女住立樹下，執百億寶無數瓔珞，出妙音樂。時樂音中，演說不退轉地法輪之行。其樹生果如頗黎色，一切眾色入頗黎色中，是諸光明右旋婉轉，流出眾音，眾音演說大慈大悲法。一一垣牆高六十二由旬，厚十四由旬，五百億龍王

圍繞此垣，一一龍王雨五百億七寶行樹，莊嚴垣上，自然有風吹動此樹，樹相振觸，演說苦空無常無我諸波羅蜜。

爾時此宮有一大神，名牢度跋提，即從座起，遍禮十方佛，發弘誓願：『若我福德應為彌勒菩薩造善法堂，令我額上自然出珠。』既發願已，額上自然出五百億寶珠，琉璃頗黎，一切眾色無不具足，如紫紺摩尼表裏暎徹。此摩尼光迴旋空中，化為四十九重微妙寶宮。一一欄楯萬億梵摩尼寶所共合成。諸欄楯間自然化生九億天子，五百億天女。一一天子手中，化生無量億萬七寶蓮華，一一蓮華上有無量億光，其光明中，具諸樂器，如是天樂不鼓自鳴。此聲出時，諸女自然執眾樂器，競起歌舞，所詠歌音，演說十善四弘誓願，諸天聞者皆發無上道心。

時諸園中，有八色琉璃渠，一一渠有五百億寶珠而用合成。一一渠中有八味水，八色具足。其水上湧游梁棟間，於四門外化生四華，水出華中如寶華流。一一華上有二十四天女，身色微妙，如諸菩薩莊嚴身相，手中自然化五百億寶器。一一器中，天諸甘露自然盈滿。左肩荷佩無量瓔珞，右肩復負無量樂器。如雲住空，從水而出，讚歎菩薩六波羅蜜。若有往生兜率天上，自然得此天女侍御。亦有七寶大師子座，高四由旬，閻浮檀金無量眾寶以為莊嚴。座四角頭生四蓮華，一一蓮華百寶所成，一一寶出百億光明，其光微妙，化為五百億眾寶雜華莊嚴寶帳。時十方面百千梵王，各各持一梵天妙寶，以為寶鈴，懸寶帳上。時小梵王持天眾寶，以為羅網，彌覆帳上。爾時百

千無數天子天女眷屬，各持寶華以布座上，是諸蓮花，自然皆出五百億寶女，手執白拂侍立帳內。

持宮四角有四寶柱，一一寶柱有百千樓閣，梵摩尼珠以為絞絡。時諸閣間有百千天女，色妙無比，手執樂器，其樂音中，演說苦空無常無我諸波羅蜜。如是天宮有百億萬無量寶色，一一諸女亦同寶色。爾時十方無量諸天命終，皆願往生兜率天宮。

時兜率天宮有五大神。第一大神名曰寶幢，身雨七寶，散宮牆內，一一寶珠，化成無量樂器，懸處空中，不鼓自鳴，有無量音，適眾生意。

第二大神名曰華德，身雨眾華彌覆宮牆，化成華蓋，一一華蓋百千幢幡以為導引。

第三大神名曰香音，身毛孔中雨出微妙海此岸旃檀香，其香如雲，作百寶色，遶宮七匝。

第四大神名曰喜樂，雨如意珠，一一寶珠自然住在幢幡之上，顯說無量歸佛歸法歸比丘僧，及說五戒，無量善法諸波羅蜜，饒益勸助菩提意者。

第五大神名曰正音聲，身諸毛孔流出眾水，一一水上有五百億華，一一華上有二十五玉女，一一玉女身諸毛孔，出一切音聲，勝天魔后所有音樂。」

佛告優波離：「此名兜率陀天十善報應勝妙福處。若我住世一小劫中，廣說一生補處菩薩報應，及十善果者，不能窮盡。今為汝等略而解說。」

佛告優波離：「若有比丘及一切大眾，不厭生死，樂

生天者；愛敬無上菩提心者；欲為彌勒作弟子者，當作是觀。作是觀者，應持五戒八齋具足戒，身心精進，不求斷結，修十善法，一一思惟兜率陀天上上妙快樂。作是觀者，名為正觀；若他觀者名為邪觀。」

爾時優波離即從座起，整衣服，頭面作禮，白佛言：「世尊！兜率陀天上乃有如是極妙樂事。今此大士何時於閻浮提沒，生於彼天？」

佛告優波離：「彌勒先於波羅捺國，劫波利村，波婆利大婆羅門家生，卻後十二年二月十五日，還家本生處，結跏趺坐，如入滅定，身紫金色光明艷赫，如百千日，上至兜率陀天。其身舍利如鑄金像，不動不搖，身圓光中有首楞嚴三昧，般若波羅蜜字義炳然。時諸人天尋即為起眾

寶妙塔，供養舍利。時兜率陀天，七寶臺內摩尼殿上師子床座，忽然化生，於蓮華上結跏趺坐。身如閻浮檀金色，長十六由旬，三十二相八十種好皆悉具足，頂上肉髻髮紺琉璃色，釋迦毘楞伽摩尼，百千萬億甄叔迦寶以嚴天冠。其天寶冠有百萬億色，一一色中有無量百千化佛，諸化菩薩以為侍者，復有他方諸大菩薩，作十八變，隨意自在住天冠中。彌勒眉間有白毫相光，流出眾光作百寶色。三十二相，一一相中有五百億寶色，一一好亦有五百億寶色，一一相好艷出八萬四千光明雲。與諸天子各坐華座，晝夜六時，常說不退轉地法輪之行。經一時中成就五百億天子，令不退轉於阿耨多羅三藐三菩提。如是處兜率陀天，晝夜恆說此法，度諸天子。閻浮提歲數五十六億萬歲，爾

乃下生於閻浮提，如《彌勒下生經》說。」

佛告優波離：「是名彌勒菩薩於閻浮提沒，生兜率陀天因緣。」

佛滅度後，我諸弟子，若有精勤修諸功德；威儀不缺；掃塔塗地；以眾名香妙華供養；行眾三昧，深入正受；讀誦經典。如是等人應當至心，雖不斷結，如得六通，應當繫念，念佛形像，稱彌勒名。如是等輩若一念頃受八戒齋，修諸淨業，發弘誓願，命終之後，譬如壯士屈申臂頃，即得往生兜率陀天，於蓮華上結跏趺坐，百千天子作天伎樂，持天曼陀羅華、摩訶曼陀羅華，以散其上。讚言：『善哉善哉，善男子！汝於閻浮提廣修福業，來生此處，此處名兜率陀天，今此天主名曰彌勒，汝當歸

依。』應聲即禮，禮已，諦觀眉間白毫相光，即得超越九十億劫生死之罪。是時菩薩隨其宿緣，為說妙法，令其堅固不退轉於無上道心。如是等眾生，若淨諸業，行六事法，必定無疑當得生於兜率天上，值遇彌勒；亦隨彌勒下閻浮提，第一聞法；於未來世值遇賢劫一切諸佛，於星宿劫亦得值遇諸佛世尊，於諸佛前受菩提記。」

佛告優波離：「佛滅度後，比丘、比丘尼、優婆塞、優婆夷、天、龍、夜叉、乾闥婆、阿修羅、迦樓羅、緊那羅、摩睺羅伽等，是諸大眾，若有得聞彌勒菩薩摩訶薩名者，聞已歡喜，恭敬禮拜，此人命終，如彈指頃即得往生，如前無異。但得聞是彌勒名者，命終亦不墮黑闇處、邊地、邪見、諸惡律儀。恆生正見，眷屬成就，不謗三

寶。」

佛告優波離：「若善男子善女人，犯諸禁戒，造眾惡業，聞是菩薩大悲名字，五體投地，誠心懺悔，是諸惡業速得清淨。未來世中諸眾生等，聞是菩薩大悲名稱，造立形像，香華衣服繒蓋幢幡，禮拜繫念。此人命欲終時，彌勒菩薩放眉間白毫大人相光，與諸天子雨曼陀羅華，來迎此人，此人須臾即得往生，值遇彌勒，頭面禮敬，未舉頭頃便得聞法，即於無上道得不退轉，於未來世得值恆河沙等諸佛如來。」

佛告優波離：「汝今諦聽，是彌勒菩薩，於未來世當為眾生作大歸依處，若有歸依彌勒菩薩者，當知是人於無上道得不退轉。彌勒菩薩成多陀阿伽度阿羅訶三藐三佛陀

時，如此行人見佛光明，即得授記。」

佛告優波離：「佛滅度後，四部弟子天龍鬼神，若有欲生兜率陀天者，當作是觀，繫念思惟，念兜率陀天，持佛禁戒，一日至七日，思念十善，行十善道，以此功德迴向，願生彌勒前者，當作是觀。作是觀者，若見一天人，見一蓮華，若一念頃稱彌勒名，此人除卻千二百劫生死之罪。但聞彌勒名，合掌恭敬，此人除卻五十劫生死之罪。若有禮敬彌勒者，除卻百億劫生死之罪。設不生天，未來世中，龍華菩提樹下亦得值遇，發無上道心。」

說是語時，無量大眾即從座起，頂禮佛足，禮彌勒足，遶佛及彌勒菩薩百千匝，未得道者各發誓願：「我等天人八部，今於佛前發誠實誓願，於未來世值遇彌勒，捨

此身已，皆得上生兜率陀天。」

世尊記曰：「汝等及未來世修福持戒，皆當往生彌勒菩薩前，為彌勒菩薩之所攝受。」

佛告優波離：「作是觀者名為正觀，若他觀者名為邪觀。」

爾時尊者阿難即從座起，叉手長跪，白佛言：「世尊！善哉世尊！快說彌勒所有功德，亦記未來世修福眾生所得果報。我今隨喜。唯然世尊！此法之要云何受持？當何名此經？」

佛告阿難：「汝持佛語，慎勿忘失，為未來世開生天路，示菩提相，莫斷佛種。此經名《彌勒菩薩般涅槃》，亦名《觀彌勒菩薩生兜率陀天勸發菩提心》，如是受

持。」

佛說是語時，他方來會十萬菩薩，得首楞嚴三昧。八萬億諸天發菩提心，皆願隨從彌勒下生。

佛說是語時，四部弟子天龍八部，聞佛所說，皆大歡喜，禮佛而退。

佛說觀彌勒菩薩上生兜率天經

佛說彌勒下生經

西晉月氏三藏竺法護譯

聞如是，一時佛在舍衛國，祇樹給孤獨園，與大比丘眾五百人俱。

爾時阿難，偏露右肩，右膝著地，白佛言：「如來玄鑒，無事不察，當來、過去、現在三世皆悉明了。過去諸佛姓字、名號、弟子菩薩翼從多少，皆悉知之。一劫、百劫、若無數劫，皆悉觀察，亦復如是。國王、大臣、人民姓字則能分別，如今現在國界若干亦復明了。將來久遠彌勒出現，至真等正覺，欲聞其變，弟子翼從，佛境豐樂，為經幾時？」

佛告阿難：「汝還就坐，聽我所說彌勒出現國土豐

樂，弟子多少。善思念之，執在心懷。」是時阿難從佛受教，即還就坐。

爾時世尊告阿難曰：「將來久遠，於此國界當有城郭，名曰翅頭，東西十二由旬，南北七由旬，土地豐熟，人民熾盛，街巷成行。爾時城中有龍王，名曰水光，夜雨香澤，晝則清和。是時翅頭城中有羅剎鬼，名曰葉華，所行順法，不違正教，每向人民寢寐之後，除去穢惡諸不淨者，常以香汁而灑其地，極為香淨。

阿難當知，爾時閻浮地，東西南北千萬由旬，諸山河石壁皆自消滅，四大海水各減一萬，時閻浮地極為平整，如鏡清明。舉閻浮地內穀食豐賤，人民熾盛，多諸珍寶。諸村落相近，鷄鳴相接。是時弊華果樹枯竭穢惡亦自消

滅，其餘甘美果樹香氣殊好者皆生於地。爾時時氣和適，四時順節。

人身之中無有百八之患，貪欲、瞋恚、愚癡不大慙，人心均平，皆同一意，相見歡悅，善言相向，言辭一類，無有差別，如彼優單越人而無有異。是時閻浮地內，人民大小皆同一向，無若干之差別也。彼時男女之類，意欲大小便時，地自然開，事訖之後地便還合。

爾時閻浮地內自然生粳米，亦無皮裹，極為香美，食無患苦。所謂金、銀、珍寶、車磔、馬瑙、真珠、琥珀，各散在地，無人省錄。是時人民手執此寶，自相謂言：『昔者之人由此寶故，更相傷害，繫閉在獄，受無數苦惱。如今此寶與瓦石同流，無人守護。』

爾時法王出現，名曰壤佉。正法治化，七寶成就。所謂七寶者，輪寶、象寶、馬寶、珠寶、玉女寶、典兵寶、守藏之寶，是謂七寶。鎮此閻浮地內，不以刀杖，自然靡伏。如今阿難四珍之藏。乾陀越國，伊羅鉢寶藏，多諸珍琦異物，不可稱計。第二、彌梯羅國，綢羅大藏，亦多珍寶。第三、須賴吒大國，有大寶藏，亦多珍寶。第四、波羅奈壤佉，有大寶藏，多諸珍寶，不可稱計。此四大藏自然應現，諸守藏人各來白王：『唯願大王，以此寶藏之物惠施貧窮。』爾時壤佉大王，得此寶已，亦復不省錄之，意無財寶之想。時閻浮地內，自然樹上生衣，極細柔軟，人取著之，如今優單越人自然樹上生衣，而無有異。

爾時彼王有大臣，名曰修梵摩，是王少小同好，王甚

愛敬。又且顏貌端正，不長不短，不肥不瘦，不白不黑，不老不少。是時修梵摩有妻，名梵摩越，王女中最，極為殊妙，如天帝妃。口作優鉢蓮華香，身作栴檀香。諸婦人八十四態永無復有，亦無疾病亂想之念。

爾時彌勒菩薩，於兜率天觀察父母不老不少，便降神下應，從右脇生，如我今日右脇生無異，彌勒菩薩亦復如是。兜率諸天各各唱令：『彌勒菩薩已降神生。』是時修梵摩即與子立字，名曰彌勒。彌勒菩薩有三十二相，八十八種好，莊嚴其身，身黃金色。爾時人壽極長，無有諸患，皆壽八萬四千歲，女人年五百歲然後出嫡。

爾時彌勒在家未經幾時，便當出家學道。爾時去翅頭城不遠，有道樹，名曰龍花，高一由旬，廣五百步。時彌

勒菩薩坐彼樹下，成無上道果。當其夜半彌勒出家，即於其夜成無上道。時三千大千剎土六返震動，地神各各相告曰：『今時彌勒已成佛！』轉至聞四天王宮，『彌勒已成佛道！』轉轉聞徹三十三天、豔天、兜率天、化自在天、他化自在天，聲聞展轉至梵天，『彌勒已成佛道！』

爾時魔王名大將，以法治化，聞如來名音響之聲，歡喜踊躍，不能自勝，七日七夜不眠不寐。是時魔王將欲界無數天人至彌勒佛所，恭敬禮拜。彌勒聖尊與諸天人，漸說法微妙之論。所謂論者，施論、戒論、生天之論，欲不淨想出要為妙。爾時彌勒見諸人民已發心歡喜，諸佛世尊常所說法，苦習盡道，盡與諸天人廣分別其義。爾時座上八萬四千天子，諸塵垢盡，得法眼淨。爾時大將魔王告

彼界人民之類曰：『汝等速出家，所以然者，彌勒今日已度彼岸，亦當度汝等使至彼岸。』爾時翅頭城中有長者，名曰善財，聞魔王教令，又聞佛音響，將八萬四千眾至彌勒佛所，頭面禮足，在一面坐。爾時彌勒漸與說法微妙之論。所謂論者，施論、戒論、生天之論，欲不淨想出要為妙。爾時彌勒見諸人民心開意解，如諸佛世尊常所說法，苦習盡道，與諸人民廣分別義。爾時座上八萬四千人，諸塵垢盡，得法眼淨。是時善財與八萬四千人等，即前白佛求索出家，善修梵行，盡成阿羅漢道。爾時彌勒初會八萬四千人得阿羅漢。

是時壤佉王，聞彌勒已成佛道，便往至佛所欲得聞法。時彌勒佛與王說法，初善、中善、竟善，義理深邃。

爾時大王復於異時立太子為王，賜剃頭師珍寶，復以雜寶與諸梵志，將八萬四千眾往至佛所，求作沙門，盡成道果，得阿羅漢。

是時修梵摩大長者，聞彌勒已成佛道，將八萬四千梵志之眾往至佛所，求作沙門，得阿羅漢，唯修梵摩一人斷三結使，必盡苦際。

是時佛母梵摩越，復將八萬四千婁女之眾往至佛所，求作沙門，爾時諸女人盡得阿羅漢，唯有梵摩越一人斷三結使，成須陀洹。

爾時諸剎利婦聞彌勒如來出現世間，成等正覺，數千萬眾往至佛所，頭面禮足，在一面坐，各各生心，求作沙門出家學道，或有越次取證，或有不取證者。爾時阿難，

其不越次取證者，盡是奉法之人，患厭一切世間，修不可樂想。爾時彌勒當說三乘之教，如我今日。

弟子之中大迦葉者，行十二頭陀，過去諸佛所善修梵行，此人當佐彌勒，勸化人民。」

爾時迦葉去如來不遠，結加趺坐，正身正意，繫念在前。

爾時世尊告迦葉曰：「吾今年已衰耗，向八十餘。然今如來有四大聲聞，堪任遊化，智慧無盡，眾德具足。云何為四？所謂大迦葉比丘、屠鉢歎比丘、賓頭盧比丘、羅云比丘。汝等四大聲聞，要不般涅槃；須吾法沒盡，然後乃當般涅槃。大迦葉亦不應般涅槃，要須彌勒出現世間。所以然者？彌勒所化弟子，盡是釋迦文弟子，由我遺化得

盡有漏。

摩竭國界毘提村中，大迦葉於彼山中住。又彌勒如來將無數千人眾，前後圍遶往至此山中，遂蒙佛恩，諸鬼神當與開門，使得見迦葉禪窟。是時彌勒，申右手指示迦葉，告諸人民：『過去久遠釋迦文佛弟子，名曰迦葉，今日現在，頭陀苦行最為第一。』是時諸人見是事已，歎未曾有。無數百千眾生，諸塵垢盡，得法眼淨。或復有眾生見迦葉身已，此名為最初之會，九十六億人皆得阿羅漢。斯等之人皆是我弟子，所以然者？悉由受我訓之所致也，亦由四事因緣，惠施仁愛，利人等利。

爾時阿難，彌勒如來當取迦葉僧伽梨著之，是時迦葉身體奄然星散。是時彌勒復取種種華香，供養迦葉，所以

然者，諸佛世尊有敬心於正法故，彌勒亦由我所受正法化，得成無上真正之道。

阿難當知，彌勒佛第二會時，有九十四億人皆是阿羅漢，亦復是我遺教弟子，行四事供養之所致也。又彌勒第三之會，九十二億人皆是阿羅漢，亦復是我遺教弟子。爾時比丘姓號皆名慈氏弟子，如我今日諸聲聞皆稱釋迦弟子。

爾時彌勒與諸弟子說法：『汝等比丘，當思惟無常之想，樂有苦想，計我無我想，實有空想，色變之想，青瘀之想，膨脹之想，食不消想，膿血想，一切世間不可樂想。所以然者？比丘當知，此十想者，皆是過去釋迦文佛與汝等說，令得盡有漏，心得解脫。若此眾中釋迦文佛弟

子，過去時修於梵行，來至我所。或復於釋迦文佛所，供養三寶，來至我所。或於釋迦文佛所，彈指之頃修於善本，來至此間。或於釋迦文佛所，行四等心，來至此者。或於釋迦文佛所，受持五戒三自歸法，來至我所。或於釋迦文佛所，起神寺廟，來至我所。或於釋迦文佛所，補治故寺，來至我所。或於釋迦文佛所，受八關齋法，來至我所。或於釋迦文佛所，香華供養，來至此者。或復於彼聞法悲泣墮淚，來至我所。或復於釋迦文佛所，專意聽受法，來至我所。或復盡形壽善修梵行，來至我所。或復有書寫讀誦，來至我所。或復承事供養，來至我所者。』

是時彌勒便說此偈：

『增益戒聞德，禪及思惟業，

善修於梵行，而來至我所。
勸施發歡心，修行心原本，
意無若干想，皆來至我所。
或發平等心，承事於諸佛，
飯飴於聖眾，皆來至我所。
或誦戒契經，善習與人說，
熾然於法本，今來至我所。
釋種善能化，供養諸舍利，
承事法供養，今來至我所。
若有書寫經，班宣於素上，
其有供養經，皆來至我所。
繒綵及諸物，供養於神寺，

自稱南無佛，皆來至我所。

供養於現在，諸佛過去者，

禪定正平等，亦無有增減。

是故於佛法，承事於聖眾，

專心事三寶，必至無為處。』

阿難當知，彌勒如來在彼眾中當說此偈。爾時彼眾中

諸天人民，思惟此十想，十一姦人諸塵垢盡，得法眼淨。

彌勒如來千歲之中，眾僧無有瑕穢，爾時恆以一偈以

為禁戒：

口意不行惡，身亦無所犯，

當除此三行，速脫生死關。

過千歲後當有犯戒之人，遂復立戒。

彌勒如來當壽八萬四千歲，般涅槃後，遺法當在八萬四千歲。所以然者？爾時眾生皆是利根。

其有善男子善女人，欲得見彌勒佛及三會聲聞眾，及翅頭城，及見蟻佉王并四大藏珍寶者，欲食自然粳米者，并著自然衣裳，身壞命終生天上者，彼善男子善女人，當勤加精進，無生懈怠，亦當供養承事諸法師，名花擣香種種供養，無令有失。如是阿難，當作是學。」

爾時阿難及諸大會，聞佛所說，歡喜奉行。

佛說彌勒下生經

佛說彌勒下生經（三法護譯）

佛說彌勒下生成佛經

後秦龜茲國三藏鳩摩羅什譯

大智舍利弗，能隨佛轉法輪，佛法之大將。憐愍眾生故，白佛言：「世尊！如前後經中說，彌勒當下作佛。願欲廣聞彌勒功德、神力、國土莊嚴之事。眾生以何施、何戒、何慧得見彌勒？」

爾時佛告舍利弗：「我今廣為汝說，當一心聽。」

舍利弗！四大海水以漸減少三千由旬，是時閻浮提地，長十千由旬，廣八千由旬，平坦如鏡。名華軟草遍覆其地，種種樹木華果茂盛。其樹悉皆高三十里。城邑次比，鷄飛相及。

人壽八萬四千歲，智慧威德，色力具足，安隱快樂。

唯有三病，一者、便利，二者、飲食，三者、衰老。女人年五百歲，爾乃行嫁。

是時有一大城，名翅頭末，長十二由旬，廣七由旬，端嚴殊妙莊嚴清淨，福德之人充滿其中。以福德人故，豐樂安隱。其城七寶上有樓閣，戶牖軒窗皆是眾寶，真珠羅網彌覆其上。街巷道陌廣十二里，掃灑清淨。有大力龍王，名曰多羅尸棄，其池近城，龍王宮殿在此池中。常於夜半，降微細雨用淹塵土。其地潤澤譬若油塗，行人來往無有塵坌。

時世人民福德所致，巷陌處處有明珠柱，皆高十里，其光明曜晝夜無異，燈燭之明不復為用。城邑舍宅及諸里巷，乃至無有細微土塊，純以金沙覆地，處處皆有金銀之

聚。

有大夜叉神，名跋陀波羅賒塞迦，常護此城，掃除清淨。若有便利不淨，地裂受之，受已還合。人命將終，自然行詣塚間而死。

時世安樂，無有怨賊劫竊之患，城邑聚落無閉門者，亦無哀惱水火刀兵，及諸饑饉毒害之難。人常慈心，恭敬和順，調伏諸根，語言謙遜。

舍利弗！我今為汝粗略說彼國界城邑富樂之事。其諸園林池泉之中，自然而有八功德水，青紅赤白雜色蓮花遍覆其上。其池四邊四寶階道，眾鳥和集。鵝、鴨、鴛鴦、孔雀、翡翠、鸚鵡、舍利、鳩那羅、耆婆耆婆等，諸妙音鳥常在其中。復有異類妙音之鳥，不可稱數。果樹香樹充

滿國內。爾時閻浮提中，常有好香，譬如香山。流水美好，味甘除患。雨澤隨時穀稼滋茂，不生草穢，一種七穫。用功甚少，所收甚多。食之香美氣力充實。

其國爾時有轉輪王，名曰壤佉。有四種兵，不以威武治四天下。其王千子，勇健多力，能破怨敵。王有七寶，金輪寶、象寶、馬寶、珠寶、女寶、主藏寶、主兵寶。

又其國土有七寶臺，舉高千丈，千頭千輪，廣六十丈。

又有四大藏，一一大藏各有四億小藏圍繞。伊勒鉢大藏在乾陀羅國，般軸迦大藏在彌緹羅國，賓伽羅大藏在須羅吒國，壤佉大藏在波羅捺國。此四大藏縱廣千由旬，滿中珍寶，各有四億小藏附之。有四大龍王各自守護。此四

大藏及諸小藏，自然踊出，形如蓮華，無央數人皆共往觀。是時眾寶無守護者，眾人見之心不貪著，棄之於地，猶如瓦石草木土塊。時人見者皆生厭心，而作是念：『往昔眾生為此寶故，共相殘害，更相偷劫欺誑妄語，令生死罪緣展轉增長。』

翅頭末城眾寶羅網彌覆其上，寶鈴莊嚴，微風吹動，其聲和雅如扣鐘聲。

其城中有大婆羅門主，名曰妙梵。婆羅門女，名曰梵摩波提。彌勒託生以為父母。身紫金色三十二相，眾生視之無有厭足，身力無量不可思議，光明照曜無所障礙，日月火珠都不復現。身長千尺，胸廣三十丈，面長十二丈四尺。身體具足端正無比，成就相好如鑄金像。肉眼清淨見

十由旬。常光四照面百由旬，日月火珠光不復現，但有佛光微妙第一。

彌勒菩薩觀世五欲致患甚多，眾生沈沒在大生死，甚可憐愍。自以如是正念觀故，不樂在家。

時壤佉王共諸大臣，持此寶臺奉上彌勒，彌勒受已，施諸婆羅門。婆羅門受已，即便毀壞各共分之。彌勒菩薩見此妙臺須臾無常，知一切法皆亦磨滅，修無常想出家學道。坐於龍華菩提樹下，樹莖枝葉高五十里。即以出家日得阿耨多羅三藐三菩提。

爾時諸天龍神王，不現其身，而雨華香供養於佛。三千大千世界皆大震動。佛身出光照無量國，應可度者皆得見佛。

爾時人民各作是念：『雖復千萬億歲受五欲樂，不能得免三惡道苦，妻子財產所不能救。世間無常，命難久保。我等今者宜於佛法修行梵行。』作是念已，出家學道。

時壤佉王亦共八萬四千大臣，恭敬圍繞出家學道。復有八萬四千諸婆羅門，聰明大智，於佛法中亦共出家。復有長者名須達那，今須達長者是，是人亦與八萬四千人俱共出家。復有梨師達多、富蘭那兄弟，亦與八萬四千人出家。復有二大臣，一名栴檀，二名須曼，王所愛重，亦與八萬四千人俱，於佛法中出家。壤佉王寶女名舍彌婆帝，今之毘舍佉是也，亦與八萬四千姝女俱共出家。壤佉王太子名曰天色，今提婆娑那是，亦與八萬四千人俱共出家。

彌勒佛親族婆羅門子名須摩提，利根智慧，今鬱多羅是，亦與八萬四千人俱，於佛法中出家。如是等無量千萬億眾，見世苦惱，皆於彌勒佛法中出家。

爾時彌勒佛見諸大眾，作是念言：『今諸人等不以生天樂故，亦復不為今世樂故，來至我所，但為涅槃常樂因緣。是諸人等，皆於佛法中種諸善根，釋迦牟尼佛遣來付我，是故今者皆至我所，我今受之。是諸人等，或以讀誦分別決定修妬路、毘尼、阿毘曇藏，修諸功德來至我所。或以衣食施人、持戒、智慧，修此功德來至我所。或以幡蓋華香供養於佛，修此功德來至我所。或以布施、持齋、修習慈心，行此功德來至我所。或為苦惱眾生令其得樂，修此功德來至我所。或以持戒、忍辱、修清淨慈，以此功

德來至我所。或以施僧常食、齋講設會、供養飯食，修此功德來至我所。或以持戒、多聞、修行禪定、無漏智慧，以此功德來至我所。或以起塔供養舍利，以此功德來至我所。善哉釋迦牟尼佛！能善教化如是等百千萬億眾生，令至我所。」

彌勒佛如是三稱讚釋迦牟尼佛，然後說法，而作是言：『汝等眾生能為難事，於彼惡世貪欲、瞋恚、愚癡迷惑短命人中，能修持戒，作諸功德，甚為希有。爾時眾生不識父母、沙門、婆羅門，不知道法，互相惱害，近刀兵劫，深著五欲，嫉妬諂曲，佞濁邪偽，無憐愍心，更相殺害食肉飲血。汝等能於其中修行善事，是為希有。善哉釋迦牟尼佛！以大悲心，能於苦惱眾生之中，說誠實語，示

我當來度脫汝等。如是之師甚為難遇，深心憐愍惡世眾生，救拔苦惱令得安隱。釋迦牟尼佛為汝等故，以頭布施，割截耳鼻手足支體，受諸苦惱以利汝等。」

彌勒佛如是開導安慰無量眾生，令其歡喜，然後說法。福德之人充滿其中，恭敬信受，渴仰大師，各欲聞法，皆作是念：『五欲不淨，眾苦之本。』又能除捨憂感愁惱，知苦樂法皆是無常。彌勒佛觀察時會大眾心淨調柔，為說四諦，聞者同時得涅槃道。

爾時彌勒佛於華林園，其園縱廣一百由旬，大眾滿中。初會說法，九十六億人得阿羅漢；第二大會說法，九十四億人得阿羅漢；第三大會說法，九十二億人得阿羅漢。

彌勒佛既轉法輪度天人已，將諸弟子入城乞食。無量淨居天眾恭敬，從佛入翅頭末城。當入城時，現種種神力無量變現。釋提桓因與欲界諸天，梵天王與色界諸天，作百千伎樂歌詠佛德，雨天諸華栴檀末香供養於佛。街巷道陌豎諸幡蓋，燒眾名香，其煙如雲。

世尊入城時，大梵天王、釋提桓因，合掌恭敬以偈讚曰：

『正遍知者兩足尊，天人世間無與等，
十力世尊甚希有，無上最勝良福田。
其供養者生天上，稽首無比大精進。』

爾時天人、羅剎等，見大力魔佛降伏之，千萬億無量眾生皆大歡喜，合掌唱言：『甚為希有！甚為希有！如來

神力功德具足，不可思議。』是時天人以種種雜色蓮花，及曼陀羅花，散佛前地積至於膝。諸天空中作百千伎樂歌歎佛德。

爾時魔王於初夜後夜，覺諸人民，作如是言：『汝等既得人身，值遇好時，不應竟夜眠睡覆心。汝等若立若坐，常勤精進正念諦觀：五陰無常、苦、空、無我。汝等勿為放逸，不行佛教，若起惡業後必致悔。』時街巷男女皆効此語，言：『汝等勿為放逸，不行佛教，若起惡業後必有悔。當勤方便精進求道，莫失法利，而徒生徒死也。』

如是大師拔苦惱者，甚為難遇，堅固精進，當得常樂涅槃。

爾時彌勒佛諸弟子，普皆端正，威儀具足，厭生老病

死，多聞廣學，守護法藏。行於禪定，得離諸欲，如鳥出殼。

爾時彌勒佛，欲往長老迦葉所，即與四眾俱就耆闍崛山，於山頂上見大迦葉。時男女大眾心皆驚怪。彌勒佛讚言：『大迦葉比丘，是釋迦牟尼佛大弟子。釋迦牟尼佛於大眾中，常所讚歎頭陀第一，通達禪定解脫三昧。是人雖有大神力，而無高心，能令眾生得大歡喜。常愍下賤貧惱眾生，救拔苦惱令得安隱。』

彌勒佛讚大迦葉骨身言：『善哉大神德釋師子大弟子大迦葉，於彼惡世能修其心。』爾時人眾，見大迦葉為彌勒佛所讚，百千億人因是事已厭世得道。是諸人等，念釋迦牟尼佛，於惡世中教化無量眾生，令得具六神通，成阿

羅漢。

爾時說法之處，廣八十由旬，長百由旬，其中人眾若坐若立若近若遠，各各自見佛在其前獨為說法。彌勒佛住世六萬歲，憐愍眾生令得法眼。滅度之後，法住於世亦六萬歲。汝等宜應精進，發清淨心，起諸善業，得見世間燈明彌勒佛身必無疑也。

佛說是經已，舍利弗等歡喜受持。

佛說彌勒下生成佛經

佛說彌勒下生成佛經

唐三藏法師義淨奉 制譯

如是我聞，一時薄伽梵在王舍城鷲峯山上，與大苾芻眾俱。

爾時大智舍利子，法將中最，哀愍世間，從座而起，偏袒右肩，右膝著地，合掌恭敬，而白佛言：「世尊！我今欲少諮問，願垂聽許。」

佛告舍利弗：「隨汝所問，我當為說。」

時舍利子即以伽他請世尊曰：

「大師所授記，當來佛下生，

彼號為慈氏，如前後經說。

唯願人中尊，伽陀重分別，

彼神通威德，我今樂欲聞。」

佛告舍利子：「應至心諦聽，

當來慈氏尊，為汝廣宣說。

爾時大海水，以漸減三千，

二百踰繕那，為顯輪王路。

瞻部洲縱廣，有萬踰繕那，

有情住其中，在處皆充滿。

國土咸富盛，無罰無災厄，

彼諸男女等，皆由善業生。

地無諸棘刺，唯生青軟草，

履踐隨人足，喻若覩羅綿。

自然出香稻，美味皆充足。

諸樹生衣服，眾綵共莊嚴。
樹高三俱舍，花菓常充實。
時彼國中人，皆壽八萬歲，
無有諸疾苦，離惱常安樂；
具相悉端嚴，色力皆圓滿。
人患有三種，食衰老便利。
女年五百歲，方乃作婚姻。
諸有欲便利，地裂而容受。
人命將終盡，自往詣屍林。
城名妙幢相，輪王之所都，
縱十二由旬，廣七由旬量。
其中所居者，皆曾植妙因，

此城有勝德，住者咸歡喜。

樓臺并却敵，七寶之所成，

關鑰及門庭，種種寶嚴飾。

繞堞諸隍塹，皆營以妙珍，

名花悉充滿，好鳥皆翔集。

七行多羅樹，周匝而圍遶，

眾寶以莊嚴，皆懸網鈴鐸。

微風吹寶樹，演出眾妙聲，

猶如奏八音，聞者生歡喜。

處處有池沼，彌覆雜色花，

園苑擢芳林，莊嚴此城郭。

國中有聖主，其名曰餉佉，

金輪王四洲，富盛多威力。
其王福德業，勇健兼四兵，
七寶皆成就，千子悉具足。
四海咸清肅，無有戰兵戈，
正法理群生，設化皆平等。
王有四大藏，各在諸國中，
一一藏皆有，珍寶百萬億。
羯陵伽國內，藏名冰竭羅；
蜜絺羅國中，般逐迦大藏；
伊羅鉢羅藏，安處捷陀國；
婆羅痾斯境，藏名為餉佉。
此諸四伏藏，咸屬餉佉王，

百福之所資，果報咸成就。
輔國之大臣，婆羅門善淨，
四明皆曉達，多聞為國師。
博通諸雜論，善教有聞持，
訓解及聲明，莫不咸究了。
有女名淨妙，為大臣夫人，
名稱相端嚴，見者皆歡悅。
大丈夫慈氏，辭於喜足天，
來託彼夫人，作後身生處。
既懷此大聖，滿足於十月，
於是慈尊母，往趣妙花園。
至彼妙園中，不坐亦不臥，

徐立攀花樹，俄誕勝慈尊。
爾時最勝尊，出母右脇已，
如日出雲翳，普放大光明。
不染觸胞胎，如蓮花出水，
光流三界內，咸仰大慈輝。
當爾降生時，千眼帝釋主，
躬自擎菩薩，欣逢兩足尊。
菩薩於此時，自然行七步，
而於足履處，皆出寶蓮花。
遍觀於十方，告諸天人眾：
『我此身最後，無生證涅槃。』
龍降清涼水，澡沐大悲身，

天散殊妙花，虛空遍飄灑。
諸天持白蓋，掩庇大慈尊，
各生希有心，守護於菩薩。
祿母擎菩薩，三十二相身，
具足諸光明，捧持來授母。
御者進雕輦，皆用寶莊嚴，
母子昇其中，諸天共持輿。
千種妙音樂，引導而還宮，
慈氏入都城，天花如雨落。
慈尊誕降日，懷妊諸媠女，
普得身安隱，皆生智慧男。
善淨慈尊父，觀子奇妙容，

具三十二相，心生大歡喜。
父依占察法，知子有二相，
處俗作輪王，出家成正覺。
菩薩既成立，慈愍諸群生，
眾苦險難中，輪迴常不息。
金色光明朗，聲如大梵音，
目等青蓮葉，支體悉圓滿。
身長八十肘，二十肘肩量，
面廣肩量半，滿月相端嚴。
菩薩明眾藝，善教授學者，
請業童蒙等，八萬四千人。
時彼餉佉王，建立七寶幢，

幢高七十尋，廣有尋六十。
寶幢造成已，王發大捨心，
施與婆羅門，等設無遮會。
其時諸梵志，數有一千人，
得此妙寶幢，毀坏須臾頃。
菩薩觀斯已，念世俗皆然，
生死苦羈籠，思求於出離。
祈誠寂滅道，棄俗而出家，
生老病死中，救之令得出。
慈尊興願日，八萬四千人，
俱生厭離心，並隨修梵行。
於初發心夜，捨俗而出家，

還於此夜中，而昇等覺地。
時有菩提樹，號名曰龍花，
高四踰繕那，蓊鬱而榮茂。
枝條覆四面，蔭六俱盧舍，
慈氏大天尊，於下成正覺。
於人中尊勝，具八梵音聲，
說法度眾生，令離諸煩惱。
苦及苦生處，一切皆除滅，
能修八正道，登彼涅槃岸。
為諸清信者，說此四真諦，
得聞此如法，至誠而奉持。
於妙花園中，諸眾如雲集，

滿百由旬內，眷屬皆充滿。

彼輪王餉佉，聞深妙法已，

罄捨諸珍寶，祈心慕出家。

不戀上宮闈，至求於出離，

八萬四千眾，咸隨而出家。

復八萬四千，婆羅門童子，

聞王捨塵俗，亦來求出家。

主藏臣長者，其名曰善財，

并與千眷屬，亦來求出家。

寶女毘舍佉，及餘諸從者，

八萬四千眾，亦來求出家。

復過百千數，善男善女等，

聞佛宣妙法，亦來求出家。
天上天人尊，大慈悲聖主，
普觀眾心已，而演出要法。
告眾汝應知，慈悲釋迦主，
教汝修正道，來生我法中。
或以香花鬘，幢幡蓋嚴飾，
供養牟尼主，來生我法中。
或鬱金沈水，香泥用塗拭，
供養牟尼塔，來生我法中。
或歸佛法僧，恭敬常親近，
當修諸善行，來生我法中。
或於佛法中，受持諸學處，

善護無缺犯，來生我法中。

或於四方僧，施衣服飲食，

並奉妙醫藥，來生我法中。

或於四齋辰，及在神通月，

受持八支戒，來生我法中。

或以三種通，神境記教授，

化道聲聞眾，咸令煩惱除。

初會為說法，廣度諸聲聞，

九十六億人，令出煩惱障。

第二會說法，廣度諸聲聞，

九十四億人，令渡無明海。

第三會說法，廣度諸聲聞，

九十二億人，令心善調伏。
三轉法輪已，人天普純淨，
將諸弟子眾，乞食入城中。
既入妙幢城，衢巷皆嚴飾，
為供養佛故，天雨曼陀花。
四王及梵王，並餘諸天眾，
香花鬘供養，輔翼大悲尊。
大威德諸天，散以妙衣服，
繽紛遍城邑，瞻仰大醫王。
以妙寶香花，散灑諸衢街，
履踐於其上，喻若覩羅綿。
音樂及幢幡，夾路而行列，

人天帝釋眾，稱讚大慈尊。

南謨天上尊，南謨士中勝，

善哉薄伽梵，能哀愍世間。

有大威德天，當作魔王眾，

歸心合掌禮，讚仰於導師。

梵王諸天眾，眷屬而圍遶，

各以梵音聲，闡揚微妙法。

於此世界中，多是阿羅漢，

蠲除有漏業，永離煩惱苦。

人天龍神等，乾闥阿修羅，

羅剎及藥叉，皆歡喜供養。

彼時諸大眾，斷障除疑惑，

超越生死流，善修清淨行。
彼時諸大眾，離著棄珍財，
無我我所心，善修清淨行。
彼時諸大眾，毀破貪愛網，
圓滿靜慮心，善修清淨行。
慈氏天人尊，哀愍有情類，
期於六萬歲，說法度眾生。
化滿百千億，令度煩惱海，
有緣皆拯濟，方入涅槃城。
慈氏大悲尊，入般涅槃後，
正法住於世，亦滿六萬年。
若於我法中，深心能信受，

當來下生日，必奉大悲尊。

若有聰慧者，聞說如是事，
誰不起欣樂，願逢慈氏尊。

若求解脫人，希遇龍花會，
常供養三寶，當勤莫放逸。」

爾時世尊為舍利子及諸大眾，記說當來慈氏事已。復告舍利子：「若有善男子善女人，聞此法已，受持讀誦，為他演說，如說修行，香花供養書寫經卷，是諸人等當來之世，必得值遇慈氏下生，於三會中咸蒙救度。」

爾時世尊說此頌已，舍利子及諸大眾，歡喜信受，頂戴奉行。

佛說彌勒下生成佛經

佛說彌勒大成佛經

姚秦龜茲國三藏鳩摩羅什譯

如是我聞，一時佛住摩伽陀國波沙山，過去諸佛常降魔處，夏安居中，與舍利弗經行山頂，而說偈言：

「一心善諦聽，光明大三昧，

無比功德人，正爾當出世。

彼人說妙法，悉皆得充足，

如渴飲甘露，疾至解脫道。」

時四部眾，平治道路，灑掃燒香，皆悉來集。持諸供具，供養如來及比丘僧。諦觀如來，喻如孝子視於慈父；如渴思飲，愛念法父，亦復如是。各各同心，欲請法王轉正法輪。諸根不動，心心相次，流注向佛。

是時比丘、比丘尼、優婆塞、優婆夷、天、龍、鬼神、乾闥婆、阿修羅、迦樓羅、緊那羅、摩睺羅伽、人非人等，各從坐起，右遶世尊，五體投地，向佛泣淚。

爾時大智舍利弗，齊整衣服，偏袒右肩，知法王心，善能隨順，學佛法王轉正法輪，是佛輔臣，持法大將。憐愍眾生故，欲令脫苦縛，白佛言：「世尊！如來向者於山頂上說偈，讚歎第一智人，前後經中之所未說。此諸大眾，心皆渴仰，淚如盛雨，欲聞如來說未來佛，開甘露道。彌勒名字、功德、神力、國土莊嚴，以何善根、何戒、何施、何定、何慧、何等智力，得見彌勒？於何心中修八正路？」

舍利弗發此問時，百千天子，無數梵王，合掌恭敬，

異口同音共發是問，白佛言：「世尊！願使我等於未來世，得見人中最大果報，三界眼目光明——彌勒！普為眾生說大慈悲。」并八部眾亦皆如此，恭敬叉手，勸請如來。

爾時梵王與諸梵眾，異口同音合掌讚歎，而說頌曰：

「南無滿月，具足十力，
大精進將，勇猛無畏，
一切智人。超出三有，
成三達智，降伏四魔，
身為法器。心如虛空，
靜然不動，於有非有，
於無非無，達解空法，
世所讚歎。我等同心，

一時歸依，願轉法輪。」

爾時世尊告舍利弗：「當為汝等廣分別說，諦聽諦聽，善思念之。汝等今者以妙善心，欲問如來無上道業摩訶般若，如來明見，如觀掌中菴摩勒果。」

告舍利弗：「若於過去七佛所，得聞佛名，禮拜供養，以是因緣淨除業障。復聞彌勒大慈根本，得清淨心。汝等今當一心合掌，歸依未來大慈悲者。」

我當為汝廣分別說，彌勒佛國，從於淨命無諸諂偽，檀波羅蜜，尸羅波羅蜜，般若波羅蜜，得不受不著，以微妙十願大莊嚴，得一切眾生起柔軟心，得見彌勒，大慈所攝，生彼國土，調伏諸根，隨順佛化。

舍利弗！四大海水面各減少三千由旬，時閻浮提地，

縱廣正等十千由旬，其地平淨，如琉璃鏡。大適意華、悅可意華、極大香華、優曇鉢花、大金葉華、七寶葉華、白銀葉華，華鬚柔軟，狀如天繒，生吉祥菓，香味具足，軟如天綿。叢林樹華甘果美妙，極大茂盛，過於帝釋歡喜之園。其樹高顯高三十里。城邑次比，雞飛相及。皆由今佛種大善根，行慈心報，俱生彼國。

智慧威德，五欲眾具快樂安隱，亦無寒熱風火等病，無九惱苦。壽命具足八萬四千歲，無有中天。人身悉長一十六丈。日日常受極妙安樂，遊深禪定以為樂器。唯有三病，一者、飲食，二者、便利，三者、衰老。女人年五百歲，爾乃行嫁。

有一大城名翅頭末，縱廣一千二百由旬，高七由旬，

七寶莊嚴。自然化生七寶樓閣，端嚴殊妙莊校清淨。於窓牖間，列諸寶女，手中皆執真珠羅網，雜寶莊校以覆其上，密懸寶鈴，聲如天樂。七寶行樹間樹渠泉，皆七寶成。流異色水，更相暎發，交橫徐逝不相妨礙。其岸兩邊，純布金沙。街巷道陌廣十二里，悉皆清淨，猶如天園，掃灑清淨。

有大龍王名多羅尸棄，福德威力皆悉具足。其池近城龍王宮殿，如七寶樓顯現於外，常於夜半化作人像，以吉祥瓶盛香色水灑淹塵土。其地潤澤，譬如油塗，行人往來無有塵坌。

是時世人福德所致，巷陌處處有明珠柱，光喻於日，四方各照八十由旬，純黃金色，其光照耀晝夜無異，燈燭

之明猶若聚墨，香風時來吹明珠柱，雨寶瓔珞，眾人皆用服者，自然如三禪樂。處處皆有金銀珍寶摩尼珠等，積用成山。寶山放光普照城內，人民遇者，皆悉歡喜發菩提心。

有大夜叉神，名跋陀婆羅賒塞迦，晝夜擁護翅頭末城，及諸人民灑掃清淨。設有便利，地裂受之，受已還合，生赤蓮華以蔽穢氣。

時世人民，若年衰老，自然行詣山林樹下，安樂淡泊，念佛取盡，命終多生大梵天上及諸佛前。

其土安隱，無有怨賊劫竊之患。城邑聚落無閉門者，亦無衰惱水火刀兵，及諸飢饉毒害之難。人常慈心，恭敬和順，調伏諸根，如子愛父，如母愛子，語言謙遜，皆由

彌勒慈心訓導，持不殺戒不噉肉故，以此因緣生彼國者，諸根恬靜，面貌端正，威相具足，如天童子。

復有八萬四千眾寶小城以為眷屬，翅頭末城最處其中。男女大小雖遠若近，佛神力故，兩得相見，無所障礙。

夜光摩尼如意珠華遍滿世界。雨七寶花，鉢頭摩華、優鉢羅華、拘物頭華、分陀利華、曼陀羅華、摩訶曼陀羅花、曼殊沙花、摩訶曼殊沙華，彌布其地，或復風吹迴旋空中。

時彼國界城邑聚落，園林浴池，泉河流沼，自然而有八功德水。

命命之鳥、鵝、鴨、鴛鴦、孔雀、鸚鵡、翡翠、舍

利、美音鳩鵲、羅耆婆闍婆快見鳥等，出妙音聲。復有異類妙音之鳥不可稱數，遊集林池。

金色無垢淨光明華、無憂淨慧日光明華、鮮白七日香華、瞻蔔六色香華、百千萬種水陸生華，青色青光、黃色黃光、赤色赤光、白色白光，香淨無比，晝夜常生，終無萎時。有如意果樹，香美無比充滿國界，香樹金光生寶山間充滿國界，出適意香普熏一切。

爾時閻浮提中常有好香，譬若香山。流水美好味甘除患，雨澤隨時。天園成熟香美稻種，天神力故，一種七穫。用功甚少，所收甚多。穀稼滋茂無有草穢。眾生福德本事果報，入口銷化，百味具足，香美無比，氣力充實。其國爾時有轉輪聖王，名曰穰佉。有四種兵，不以威

武治四天下。具三十二大人相好。

王有千子，勇猛端正，怨敵自伏。

王有七寶，一、金輪寶，千輻轂輞皆悉具足。二、白象寶，白如雪山七牖拄地，嚴顯可觀，猶如山王。三、紺馬寶，朱鬣髦尾，足下生華，七寶蹄甲。四、神珠寶，明顯可觀，長於二肘，光明雨寶適眾生願。五、玉女寶，顏色美妙，柔軟無骨。六、主藏臣，口中吐寶，足下雨寶，兩手出寶。七、主兵臣，宜動身時，四兵如雲從空而出。千子七寶，國界人民，一切相視，不懷惡意，如母愛子。時王千子各取珍寶，於正殿前作七寶臺，有三十重，高十三由旬，千頭千輪遊行自在。

有四大寶藏，一一大藏，各有四億小藏圍繞。伊鉢多

大藏，在乾陀羅國；般軸迦大藏，在彌緹羅國；賓伽羅大藏，在須羅吒國；穰佉大藏，在婆羅奈國古仙山處。此四大藏，自然開發，顯大光明，縱廣正等一千由旬，滿中珍寶，各有四億小藏附之。有四大龍，各自守護此四大藏及諸小藏。自然踊出，形如蓮華，無央數人皆共往觀。是時眾寶無守護者，眾人見之心不貪著，棄之於地，猶如瓦石草木土塊。時人見者心生厭離，各各相謂而作是言：『如佛所說，往昔眾生為此寶故共相殘害，更相偷劫欺誑妄語，令生死苦緣展轉增長，墮大地獄。』

翅頭末城，眾寶羅網彌覆其上，寶鈴莊嚴，微風吹動，其音和雅如扣鐘磬，演說歸依佛、歸依法、歸依僧。時城中有大婆羅門主，名修梵摩。婆羅門女，名梵摩

拔提。心性和弱，彌勒託生以為父母。雖處胞胎如遊天宮，放大光明，塵垢不障。身紫金色，具三十二大丈夫相，坐寶蓮華，眾生視之無有厭足。光明晃耀，不可勝視，諸天世人所未曾覩。身力無量，一一節力普勝一切大力龍象。不可思議毛孔光明，照耀無量無有障礙，日月星宿水火珠光，皆悉不現，猶如埃塵。身長釋迦牟尼佛八十肘（三十二丈），脇廣二十五肘（十丈），面長十二肘半（五丈）。鼻高修直，當於面門，身相具足端正無比。成就相好，一一相八萬四千好，以自莊嚴，如鑄金像；一一好中流出光明，照千由旬。肉眼清徹，青白分明。常光繞身，面百由旬，日月星宿真珠摩尼，七寶行樹皆悉明耀，現於佛光，其餘眾光不復為用。佛身高顯如黃金山，見者

自然脫三惡趣。

爾時彌勒諦觀世間五欲過患，眾生受苦，沈沒長流，在大生死，甚可憐愍。自以如是正念觀察苦、空、無常，不樂在家；厭家迫迮，猶如牢獄。

時壤佉王共諸大臣國土人民，持七寶臺，有千寶帳及千寶軒、千億寶鈴、千億寶幡，寶器千口、寶甕千口，奉上彌勒。彌勒受已，施諸婆羅門。婆羅門受已，即便毀壞各共分之。諸婆羅門觀見彌勒能作大施，生大奇特心。彌勒菩薩見此寶臺須臾無常，知有為法皆悉磨滅，修無常想，讚過去佛清涼甘露無常之偈：

『諸行無常，是生滅法，
生滅滅已，寂滅為樂。』

說此偈已，出家學道，坐於金剛莊嚴道場，龍花菩提樹下。枝如寶龍，吐百寶華，一一花葉作七寶色，色色異果，適眾生意，天上人間為無有比。樹高五十由旬，枝葉四布，放大光明。

爾時彌勒與八萬四千婆羅門俱詣道場，彌勒即自剃髮出家學道。早起出家，即於是日初夜降四種魔，成阿耨多羅三藐三菩提。即說偈言：

『久念眾生苦，欲拔無由脫，
今者證菩提，霍然無所礙。
亦達眾生空，本性相如實，
永更無憂苦，慈悲亦無緣。
本為救汝等，國城及頭目，

妻子與手足，施人無有數。
今始得解脫，無上大寂滅，
當為汝等說，廣開甘露道。
如是大果報，皆從施戒慧，
六種大忍生；亦從大慈悲，
無染功德得。』

說此偈已，默而住時，諸天龍鬼神王不現其身，而雨天花供養於佛。三千大千世界六變震動，佛身出光，照於無量，應可度者皆得見佛。

爾時釋提桓因、護世天王、大梵天王、無數天子，於華林園頭面禮足，合掌勸請轉於法輪。

時彌勒佛默然受請，告梵王言：『我於長夜受大苦

惱，修行六度，始於今日法海滿、建法幢、擊法鼓、吹法
蠡、雨法雨。正爾當為汝等說法，諸佛所轉八聖道輪，諸
天世人無能轉者。其義平等，直至無上無為寂滅，為諸眾
生斷長夜苦。此法甚深，難得難入，難信難解，一切世間
無能知者，無能見者。洗除心垢，得萬梵行。』

說是語時，復有他方無數百千萬億天子天女，大梵天
王乘天宮殿，持天花香奉獻如來，繞百千匝，五體投地合
掌勸請。諸天伎樂不鼓自鳴。時諸梵王異口同聲，而說偈
言：

『無量無數歲，空過無有佛，
眾生墮惡道，世間眼目滅，
三惡道增廣，諸天路永絕。』

今日佛興世，三惡道殄滅，
增長天人眾。願開甘露門，
令眾心無著，疾疾得涅槃。
我等諸梵王，聞佛出世間，
今者得值佛，無上大法王。
梵天宮殿盛，身光亦明顯，
普為十方眾，勸請大導師。

唯願開甘露，轉無上法輪。』

說此偈已，頭面作禮，復更合掌慇懃三請：『唯願世尊，轉於甚深微妙法輪，為拔眾生苦惱根栽，遠離三毒，破四惡道不善之業。』

爾時世尊為諸梵王，即便微笑出五色光，默然許之。

時諸天子無數大眾，聞佛許可，歡喜無量，遍體踊躍。譬如孝子新喪慈父，忽然還活。大眾歡喜亦復如是。時諸天眾右遶世尊，經無數匝，敬愛無厭却住一面。

爾時大眾皆作是念：『雖復千億歲受五欲樂，不能得免三惡道苦，妻子財產所不能救，世間無常，命難久保。

我等今者於佛法中淨修梵行。』作是念已，復更念言：

『設受五欲經無數劫，如無想天壽無量億歲，與諸姝女共相娛樂，受細滑觸，會歸磨滅，墮三惡道受無量苦，所樂無幾猶如幻化，蓋不足言。入地獄時大火洞然，百億萬劫受無量苦，求脫叵得。如此長夜苦厄難拔，今日遇佛，宜勤精進。』

時穰佉王高聲唱言：

『設復生天樂，會亦歸磨滅，不久墮地獄，猶如猛火聚。

我等宜時速，出家學佛道。』

說是語已，時穰佉王，與八萬四千大臣恭敬圍繞，及四天王送轉輪王，至華林園龍花樹下，詣彌勒佛求索出家。為佛作禮，未舉頭頃，鬚髮自落，袈裟著身，便成沙門。

時彌勒佛共穰佉王，與八萬四千大臣、諸比丘等，恭敬圍繞，并與無數天龍八部，入翅頭末城。足躡門閫，娑婆世界六種震動。閻浮提地化為金色。翅頭末大城中央，其地金剛，有過去諸佛所坐金剛寶座，自然踊出。眾寶行樹。天於空中雨大寶華。龍王作眾伎樂，口中吐華，毛孔

雨華，用供養佛。

佛於此座轉正法輪：『謂是苦，苦聖諦；謂是集，集聖諦；謂是滅，滅聖諦；謂是道，道聖諦。』并為演說三十七品助菩提法。亦為宣說十二因緣：『無明緣行，行緣識，識緣名色，名色緣六入，六入緣觸，觸緣受，受緣愛，愛緣取，取緣有，有緣生，生緣老死憂悲苦惱等。』

爾時大地六種震動，如此音聲聞於三千大千世界，復過是數無量無邊，下至阿鼻地獄，上至阿迦膩吒天。時四天王各各將領無數鬼神，高聲唱言：『佛日出時，降法雨露，世間眼目今者始開。普令大地一切八部，於佛有緣皆得聞知。』

三十三天、夜摩天、兜率陀天、化樂天、他化自在

天，乃至大梵天，各各於己所統領處，高聲唱言：『佛日出世，降注甘露，世間眼目今者始開。有緣之者皆悉聞知。』

時諸龍王八部，山神、樹神、藥草神、水神、風神、火神、地神、城池神、屋宅神等，踊躍歡喜，高聲唱言。

復有八萬四千諸婆羅門，聰明大智，於佛法中，亦隨大王出家學道。復有長者，名須達那，今須達長者是，亦與八萬四千人俱共出家。復有梨師達多、富蘭那兄弟，亦與八萬四千人俱共出家。復有二大臣，一名梵檀末利，二名須曼那，王所愛重，亦與八萬四千人俱，於佛法中出家學道。轉輪王寶女名舍彌婆帝，今之毘舍佉母是也，亦與八萬四千姝女俱共出家。穰佉太子，名天金色，今提婆婆

那長者子是，亦與八萬四千人俱共出家。彌勒佛親族婆羅門子，名須摩提，利根智慧，今鬱多羅善賢比丘尼子是，亦與六萬人俱，於佛法中俱共出家。穰佉王千子，唯留一人用嗣王位，餘九百九十九人，亦與八萬四千人，於佛法中俱共出家。如是等無量億眾，見世苦惱，五陰熾然，皆於彌勒佛法中俱共出家。

爾時彌勒佛以大慈心語諸大眾言：『汝等今者不以生天樂故，亦復不為今世樂故來至我所，但為涅槃常樂因緣。是諸人等，皆於佛法中種諸善根。釋迦牟尼佛出五濁世，種種呵責為汝說法，無奈汝何，教殖來緣，今得見我。我今攝受是諸人等，或以讀誦分別決定修多羅、毘尼、阿毘曇，為他演說讚歎義味，不生嫉妬，教於他人令

得受持，修諸功德來生我所。或以衣食施人、持戒、智慧，修此功德來生我所。或以妓樂幡蓋華香燈明供養於佛，修此功德來生我所。或以施僧常食，起立僧房四事供養，持八戒齋修習慈心，行此功德來生我所。或為苦惱眾生深生慈悲，以身代受令其得樂，修此功德來生我所。或以持戒、忍辱、修淨慈心，以此功德來生我所。或造僧祇四方無礙齋講設會，供養飯食，修此功德來生我所。或以持戒、多聞、修行禪定、無漏智慧，以此功德來生我所。或有起塔供養舍利，念佛法身，以此功德來生我所。或有厄困貧窮孤獨繫屬於他，王法所加，臨當刑戮，作八難業受大苦惱，拔濟彼等令得解脫，修此功德來生我所。或有恩愛別離，朋黨諍訟，極大苦惱，以方便力令得和合，修

此功德來生我所。』

說是語已，稱讚釋迦牟尼佛：『善哉！善哉！能於五濁惡世，教化如是等百千萬億諸惡眾生，令修善本來生我所。』

時彌勒佛如是三稱讚釋迦牟尼佛，而說偈言：

『忍辱勇猛大導師，能於五濁不善世，教化成熟惡眾生，令彼修行得見佛。荷負眾生受大苦，令入常樂無為處，教彼弟子來我所，我今為汝說四諦，亦說三十七菩提，莊嚴涅槃十二緣。汝等宜當觀無為，入於空寂本無處。』

說此偈已，復更讚歎彼時眾生：『於苦惡世能為難

事，貪欲、瞋恚、愚癡迷惑短命人中，能修持戒作諸功德，甚為希有。爾時眾生不識父母、沙門、婆羅門，不知道法；互相惱害，近刀兵劫；深著五欲，嫉妬諂佞；曲濁邪偽，無憐愍心，更相殺害食肉飲血；不敬師長，不識善友，不知報恩；生五濁世不知慚愧，晝夜六時相續作惡，不知厭足；純造不善五逆惡聚，魚鱗相次求不知厭，九親諸族不能相濟。善哉！善哉！釋迦牟尼佛！以大方便深厚慈悲，能於苦惱眾生之中，和顏美色，善巧智慧，說誠實語，示我當來度脫汝等。如是導師明利智慧，世間希有，甚為難遇。深心憐愍惡世眾生，為拔苦惱令得安隱，入第一義甚深法性。釋迦牟尼三阿僧祇劫，為汝等故修行難行苦行，以頭布施，割截耳鼻手足肌體，受諸苦惱，為八聖

道，平等解脫利汝等故。』

時彌勒佛如是開導安慰無量諸眾生等，令其歡喜。彼時眾生身純是法，心純是法，口常說法。福德智慧之人充滿其中，天人恭敬信受渴仰。

時大導師各欲令彼聞於往昔苦惱之事，復作是念：『五欲不淨，眾苦之本。又能除捨憂感愁恨，知苦樂法皆是無常。』為說色、受、想、行、識，苦、空、無常、無我。說是語時，九十六億人不受諸法，漏盡意解，得阿羅漢，三明六通，具八解脫。三十六萬天子，二十萬天女發阿耨多羅三藐三菩提心。天龍八部中，有得須陀洹者，種辟支佛道因緣者，發無上道心者，數甚眾多不可稱計。

爾時彌勒佛，與九十六億大比丘眾，并穰佉王八萬四

千大臣比丘眷屬圍繞，如月天子諸星宿從，出翅頭末城，還華林園重閣講堂。

時閻浮提城邑聚落小王長者，及諸四姓皆悉來集龍花樹下華林園中。爾時世尊重說四諦十二因緣，九十四億人得阿羅漢；他方諸天及八部眾六十四億恆河沙人，發阿耨多羅三藐三菩提心，住不退轉。

第三大會，九十二億人得阿羅漢，三十四億天龍八部，發三菩提心。

時彌勒佛說四聖諦深妙法輪，度天人已，將諸聲聞弟子、天龍八部一切大眾，入城乞食。無量淨居天眾，恭敬從佛，入翅頭末城。當入城時，佛現十八種神足，身下出水，如摩尼珠，化成光臺照十方界；身上出火，如須彌山

流紫金光，現大滿空化成琉璃；大復現小如芥子許，泯然不現；於十方踊於十方沒，令一切人皆如佛身。種種神力無量變現，令有緣者皆得解脫。

釋提桓因三十二輔臣與欲界諸天，梵天王與色界諸天，并天子天女，脫天瓔珞及以天衣，而散佛上。時諸天衣化成花蓋，諸天妓樂不鼓自鳴，歌詠佛德。密雨天花，栴檀雜香供養於佛。街巷道陌豎諸幢幡，燒諸名香，其煙若雲。世尊入城時，大梵天王、釋提桓因，合掌恭敬以偈讚佛：

『正遍知者兩足尊，天人世間無與等，
十力世尊甚希有，無上最勝良福田。
其供養者生天上，未來解脫住涅槃，

稽首無上大精進，稽首慈心大導師。』

東方天王提頭賴吒，南方天王毘樓勒叉，西方天王毘留博叉，北方天王毘沙門王，與其眷屬恭敬合掌，以清淨心讚歎世尊：

『三界無有比，大悲自莊嚴，
體解第一義，不見眾生性，
及與諸法相，同入空寂性，
善住無所有。雖行大精進，
無為無足跡，我今稽首禮，
慈心大導師。眾生不見佛，
長夜受生死，墜墮三惡道，
及作女人身。今日佛興世，

拔苦施安樂，三惡道已少，
女人無諂曲，皆當得止息，
具足大涅槃。大悲濟苦者，
施樂故出世。本為菩薩時，
常施一切樂，不殺不惱他，
忍心如大地。我今稽首禮，
忍辱大導師；我今稽首禮，
慈悲大丈夫。自免生死苦，
能拔眾生厄，如火生蓮花，
世間無有比。』

爾時世尊次第乞食，將諸比丘還至本處，入深禪定，
七日七夜寂然不動。彌勒佛弟子色如天色，普皆端正，厭

生老病死，多聞廣學，守護法藏，行於禪定，得離諸欲，如鳥出殼。

爾時釋提桓因，與欲界諸天子，歡喜踊躍，復說偈言：

『世間所歸大導師，慧眼明淨見十方，
智力功德勝諸天，名義具足福眾生。
願為我等群萌類，將諸弟子詣彼山，
供養無惱釋迦師，頭陀第一大弟子。
我等應得見過佛，所著袈裟聞遺法，
懺悔前身濁惡劫，不善惡業得清淨。』

爾時彌勒佛，與娑婆世界前身剛強眾生及諸大弟子，俱往耆闍崛山。到山下已，安詳徐步登狼跡山。到山頂

已，舉足大指躡於山根，是時大地十八相動。既至山頂，彌勒以手兩向擘山，如轉輪王開大城門。爾時梵王持天香油，灌摩訶迦葉頂，油灌身已擊大捷椎，吹大法蠡，摩訶迦葉即從滅盡定覺。齊整衣服，偏袒右肩，右膝著地，長跪合掌，持釋迦牟尼佛僧迦梨，授與彌勒而作是言：『大師釋迦牟尼，多陀阿伽度，阿羅訶，三藐三佛陀，臨涅槃時，以此法衣付囑於我，令奉世尊。』

時諸大眾各白佛言：『云何今日此山頂上有人頭蟲，短小醜陋，著沙門服，而能禮拜恭敬世尊？』

時彌勒佛訶諸大弟子：『莫輕此人！』而說偈言：

『孔雀有好色，鷹鷄鷄所食；

白象無量力，師子子雖小，

撮食如塵土；大龍身無量，
金翅鳥所搏；人身雖長大，
肥白端正好，七寶瓶盛糞，
汙穢不可堪。此人雖短小，
智慧如練金，煩惱習久盡，
生死苦無餘，護法故住此。
常行頭陀事，天人中最勝，
苦行無與等。牟尼兩足尊，
遣來至我所，汝等當一心，
合掌恭敬禮。」

說是偈已，告諸比丘：『釋迦牟尼世尊，於五濁惡世
教化眾生，千二百五十弟子中，頭陀第一，身體金色，捨

金色婦出家學道，晝夜精進如救頭然，慈愍貧苦下賤眾生，恆福度之，為法住世，摩訶迦葉者，此人是在也。』說此語已，一切大眾悉為作禮。

爾時彌勒持釋迦牟尼佛僧伽梨，覆右手不遍，纔掩兩指，復覆左手亦掩兩指。諸人怪歎先佛卑小，皆由眾生貪濁憍慢之所致耳。告摩訶迦葉言：『汝可現神足，并說過去佛所有經法。』

爾時摩訶迦葉踊身虛空，作十八變。或現大身滿虛空中，大復現小如葶藶子，小復現大，身上出水，身下出火，履地如水，履水如地，坐臥空中身不陷墜，東踊西沒，西踊東沒，南踊北沒，北踊南沒，邊踊中沒，中踊邊沒，上踊下沒，下踊上沒，於虛空中化作琉璃窟。承佛神

力，以梵音聲，說釋迦牟尼佛十二部經。大眾聞已怪未曾有，八十億人遠塵離垢，於諸法中不受諸法，得阿羅漢。無數天人發菩提心。繞佛三匝還從空下，為佛作禮，說有為法皆悉無常。辭佛而退，還者闍崛山本所住處，身上出火，入般涅槃，收身舍利山頂起塔。

彌勒佛歎言：『大迦葉比丘，是釋迦牟尼佛於大眾中，常所讚歎頭陀第一，通達禪定解脫三昧，是人雖有大神力，而無高心，能令眾生得大歡喜，常愍下賤貧苦眾生。』彌勒佛歎大迦葉骨身言：『善哉大神德釋師子大弟子大迦葉，於彼惡世能修其心。』

爾時摩訶迦葉骨身，即說偈言：

『頭陀是寶藏，持戒為甘露，

能行頭陀者，必至不死地。

持戒得生天，及與涅槃樂。」

說此偈已，如琉璃水還入塔中。

爾時說法之處，廣八十由旬，長百由旬。其中人眾若坐若立，若近若遠，各見佛在其前獨為說法。

彌勒佛住世六萬億歲，憐愍眾生故令得法眼。滅度之後，諸天世人闍維佛身，時轉輪王收取舍利，於四天下各起八萬四千塔。正法住世六萬歲，像法二萬歲。汝等宜應勤加精進，發清淨心，起諸善業，得見世間燈明彌勒佛身，必無疑也。」

佛說語已，尊者舍利弗、尊者阿難，即從座起為佛作禮，胡跪合掌，白佛言：「世尊！當何名斯經？云何奉持

之？」

佛告阿難：「汝好憶持，普為天人分別演說，莫作最後斷法人耶！此法之要，名《一切眾生斷五逆種淨除業障報障煩惱障修習慈心與彌勒共行》，如是受持！亦名《一切眾生得聞彌勒佛名必免五濁世不墮惡道經》，如是受持！亦名《破惡口業心如蓮花定見彌勒佛經》，如是受持！亦名《慈心不殺不食肉經》，如是受持！亦名《釋迦牟尼佛以衣為信經》，如是受持！亦名《若有聞佛名決定得免八難經》，如是受持！亦名《彌勒成佛經》，如是受持！」

佛告舍利弗：「佛滅度後，比丘、比丘尼、優婆塞、優婆夷、天龍八部鬼神等，得聞此經，受持讀誦，禮拜供

養，恭敬法師，破一切業障、報障、煩惱障，得見彌勒及賢劫千佛，三種菩提隨願成就，不受女人身，正見出家，得大解脫。」說是語已，時諸大眾聞佛所說，皆大歡喜，禮佛而退。

佛說彌勒大成佛經

佛說彌勒來時經

失譯人名附東晉錄

舍利弗者，是佛第一弟子，以慈心念天下，往到佛所，前長跪叉手問言：「佛常言：『佛去後當有彌勒來。』願欲從佛聞之。」

佛言：「彌勒佛欲來出時，閻浮利內地山樹草木皆焦盡。於今閻浮利地，周匝六十萬里；彌勒出時閻浮利地，東西長四十萬里，南北廣三十二萬里，地皆當生五種果蓏。四海內無山陵嶮谷，地平如砥，樹木皆長大。

當是時，人民少貪婬、瞋恚、愚癡者，人民眾多，聚落家居，鷄鳴展轉相聞。人民皆壽八萬四千歲，女人五百歲乃行嫁。人民無病痛者，盡天下人有三病，一者、意欲

有所得，二者、飢渴，三者、年老。人民面目皆桃花色，人民皆敬重。

有城名鷄頭末，鷄頭末城者當王國治。城周匝四百八十里，以土築城，復以板著城，復以金銀、琉璃、水精、珍寶著城。四面各十二門，門皆刻鏤，復以金銀、琉璃、水精、珍寶著之。

國王名僧羅，四海內皆屬僧羅。行即飛行，所可行處，人民鬼神皆傾側。

城有四寶，一者、金，有龍守之，龍名倪搔鋒，主護金，龍所居山地名犍陀。二者、銀，其國中復有守龍，名幡頭。三者、明月珠，所生地處名須漸，守珍龍名賓竭。四者、琉璃，所生城名汜羅那夷。

有一婆羅門名須凡，當為彌勒作父。彌勒母名摩訶越題，彌勒當為作子。彌勒者，種當作婆羅門，身有三十二相八十種好，身長十六丈。彌勒生墮城地，目徹視萬里內，頭中日光照四千里。

彌勒得道為佛時，於龍華樹下坐，樹高四十里，廣亦四十里。彌勒得佛時，有八萬四千婆羅門，皆往到彌勒所師事之，則棄家作沙門。彌勒到樹下坐，用四月八日明星出時得佛道。

國王僧羅聞彌勒得佛，則將八十四王，皆棄國捐王，以國付太子，共到彌勒佛所，皆除鬚髮為沙門。復有千八百婆羅門，皆到彌勒佛所作沙門，彌勒父母亦在其中。復有聖婆羅門千八十四人，皆復到彌勒佛所作沙門。國有大

豪賢者，名須檀，人呼須達，復呼人民，以黃金持與彌勒佛及諸沙門，名聲日布方遠。須達復將賢善人萬四千人，到彌勒佛所作沙門。復有兄弟二人，兄名鼓達，弟名扶蘭，兄弟皆言：『我曹何為是世間？寧可俱到佛所求作沙門耶！』兄弟皆言：『我善！』便到彌勒佛所作沙門。復有小女人輩八萬四千人，身皆著好衣、白珠、金、銀、瓔珞，俱到彌勒佛所，皆脫著身珍寶以著地，白佛言：『我曹欲持是上佛及諸沙門，我欲從佛作比丘尼。』佛即令作比丘尼。

彌勒佛坐，為諸比丘僧、比丘尼說：『皆是釋迦文佛時，誦經者，慈心者，布施者，不瞋恚者，作佛圖寺者，持佛骨著塔中者，燒香者，然燈者，懸繒者，散花者，讀

經者。是諸比丘尼，皆釋迦文佛時人，持戒者，至誠者，於今皆來會。是聞諸比丘所說經處者，皆於龍華樹下得道。』

彌勒佛初一會說經時，有九十六億人皆得阿羅漢道。第二會說經時，有九十四億比丘皆得阿羅漢。第三會說經，九十二億沙門皆得阿羅漢。舉天上諸天，皆當持花散彌勒身上。

彌勒佛當將諸阿羅漢，至雞頭末王所治城，王皆內宮中飯食，舉城皆明，夜時如晝日。彌勒於宮中坐說經言：『語不可不作，道不可不學，經不可不讚。』佛說經已，諸比丘及王百官，皆當奉行佛經戒，皆得度世。」

佛說如是，彌勒佛却後六十億殘六十萬歲當來下。

佛說彌勒來時經

佛說彌勒來時經

大寶積經彌勒菩薩所問會

大唐三藏菩提流志譯

如是我聞，一時佛在波羅奈國施鹿林中，與大比丘眾五百人俱，一切皆為眾所知識。其名曰：阿若憍陳如、摩訶迦葉、優樓頻螺迦葉、伽耶迦葉、那提迦葉、舍利弗、大目犍連、阿難、羅睺羅等而為上首。復有菩薩摩訶薩一萬人俱。其名曰：善意菩薩、增上意菩薩、堅固意菩薩、師子意菩薩、觀世音菩薩、大勢至菩薩、辯積菩薩、美音菩薩、勝幢菩薩、信慧菩薩、水天菩薩、帝勝菩薩、帝天菩薩、無攀緣菩薩、具辯才菩薩、神通妙華菩薩、彌勒菩薩、文殊師利法王子等而為上首。

爾時世尊，無量百千大眾圍遶，供養恭敬，而為說

法。

是時彌勒菩薩摩訶薩，在眾會中，即從座起，偏袒右肩，右膝著地，合掌頂禮，而白佛言：「世尊！我有少疑，今欲諮問，唯願如來見垂聽許。」

佛告彌勒菩薩言：「若有所疑，今恣汝問，當為解說令得歡喜。」

爾時彌勒菩薩聞佛許已，歡喜踊躍，而白佛言：「世尊！菩薩成就幾法，離諸惡道及惡知識，而能速證阿耨多羅三藐三菩提耶？」

佛告彌勒菩薩言：「善哉善哉，彌勒！汝今為欲哀愍一切，利益安樂天人世間，能問如來如是深義。汝應諦聽，善思念之，吾當為汝分別解說。」

彌勒菩薩即白佛言：「唯然，世尊！願樂欲聞。」
佛告彌勒言：「菩薩成就一法，離諸惡道及惡知識，速能證得阿耨多羅三藐三菩提。云何為一？所謂發勝意樂菩提之心。是名為一。」

彌勒！復有二法，離諸惡道及惡知識，速能證得阿耨多羅三藐三菩提。云何為二？一者、於奢摩他常勤修習；二者、於毘鉢舍那而得善巧。是名為二。

彌勒！復有三法，離諸惡道及惡知識，速能證得阿耨多羅三藐三菩提。云何為三？一者、成就大悲；二者、修習空法；三者、於一切法不生分別。是名為三。

彌勒！復有四法，離諸惡道及惡知識，速能證得阿耨多羅三藐三菩提。云何為四？一者、安住淨戒；二者、離

諸疑網；三者、樂阿蘭若；四者、起正見心。是名為四。

彌勒！復有五法，離諸惡道及惡知識，速能證得阿耨多羅三藐三菩提。云何為五？一者、住於空法；二者、不求他過；三者、常自觀察；四者、愛樂正法；五者、攝護於他。是名為五。

彌勒！復有六法，離諸惡道及惡知識，速能證得阿耨多羅三藐三菩提。云何為六？一者、無有貪欲；二者、不生瞋恚；三者、不起愚癡；四者、常離麁語；五者、住於空性；六者、心如虛空。是名為六。

彌勒！復有七法，離諸惡道及惡知識，速能證得阿耨多羅三藐三菩提。云何為七？一者、住於正念；二者、成就擇法；三者、發起精進；四者、常生歡喜；五者、身得

輕安；六者、住諸禪定；七者、具足行捨。是名為七。

彌勒！復有八法，離諸惡道及惡知識，速能證得阿耨多羅三藐三菩提。云何為八？一者、正見；二者、正思惟；三者、正語；四者、正業；五者、正命；六者、正勤；七者、正念；八者、正定。是名為八。

彌勒！復有九法，離諸惡道及惡知識，速能證得阿耨多羅三藐三菩提。云何為九？一者、速離諸欲惡不善法，安住初禪尋伺喜樂心一境性；二者、遠離尋伺，安住二禪內淨喜樂心一境性；三者、遠離於喜，安住三禪捨念慧樂心一境性；四者、遠離憂苦及以喜樂，安住四禪捨念清淨無苦無樂心一境性；五者、超過色想，無異攀緣，安住無邊虛空處定；六者、超過無邊空處定已，而能安住無邊識

定；七者、超過無邊識處定已，而能安住無所有定；八者、超過無所有處定已，安住非想非非想定；九者、超過非想非非想定已，而能安住滅受想定。是名為九。

彌勒！復有十法，離諸惡道及惡知識，速能證得阿耨多羅三藐三菩提。云何為十？一者、善能成就金剛三昧；二者、成就處非處相應三昧；三者、成就方便行三昧；四者、成就遍照明三昧；五者、成就普光明三昧；六者、成就普遍照明三昧；七者、成就寶月三昧；八者、成就月燈三昧；九者、成就出離三昧；十者、成就勝幢臂印三昧。是名為十。

彌勒！菩薩成就如是法已，離諸惡道及惡知識，速能證得阿耨多羅三藐三菩提。」

爾時彌勒菩薩得聞是法，心大歡喜，偏袒右肩，右膝著地，合掌恭敬，即於佛前以偈讚曰：

「佛於過去劫，捨所愛妻子、
頭目及骨髓，到於施彼岸。
佛常護禁戒，如犛牛愛尾，
最勝無倫匹，到於戒彼岸。
佛以忍辱力，捨離於違諍，
不求人過惡，到於忍彼岸。
佛以精進力，得無上寂靜，
究竟常安樂，到於勤彼岸。
佛以禪定力，能滅諸罪垢，
為天人導師，到於定彼岸。」

佛以智慧力，善了知諸法，
自性無所有，到於慧彼岸。
佛於菩提樹，降伏諸魔軍，
具足最勝智，成就無上道。
導師無畏力，於波羅奈國，
轉清淨法輪，摧破諸外道。
無上大智慧，出過於世間，
能放淨光明，善說諸法要。
如來清淨色，智慧及功德，
超過諸世間，能到於彼岸。」

爾時阿難白佛言：「世尊！是彌勒菩薩甚為希有，而能成就無量辯才，隨眾生念，平等說法，而於文字無所繫

著。」

佛告阿難：「如是如是，如汝所說。阿難！彌勒菩薩豈唯今日能於我前以偈讚佛。乃往過去十無數劫，爾時有佛，號焰光遊戲妙音自在王如來、應供、正遍知、明行足、善逝、世間解、無上士、調御丈夫、天人師、佛、世尊。

爾時有一婆羅門子，名曰賢壽，諸相具足，見者歡喜。從園苑出，見彼如來端正殊妙，諸根寂靜，得奢摩他，如清淨池無諸垢穢。三十二相八十種好而自莊嚴，如娑羅樹其花開敷，如須彌山出過一切。面貌熙怡，如月盛滿。威光赫奕，如日顯曜。形量周圓，如尼俱陀樹。是時賢壽覩佛如來殊勝之相，心生淨信，作是思惟：

『希有世尊，乃能成就如是無量功德莊嚴。我亦願於當來之世，成就如是功德之身。』發是願已，投身於地，復自念言：『若當來世得佛身者，唯願如來足蹈我上。』

爾時彼佛知賢壽意，即以其足蹈賢壽身，當下足時得無生法忍。

世尊迴顧告諸比丘：『汝等勿以足蹈賢壽。何以故？此是菩薩摩訶薩，今已證得無生法忍，復能成就天眼、天眼、他心、宿住、神境智通。』

爾時賢壽，即於佛前以偈讚曰：

『佛於十方界，最尊無有上，
超過諸世間，我今稽首禮。

如來大光明，掩蔽於日月，

超過諸世間，我今稽首禮。
譬如師子吼，諸獸咸怖畏，
世尊大威德，摧伏諸外道。
眉間白毫相，猶如頗梨光，
普照於世間，超過於一切。
世尊無與等，足蹈千輻輪，
清淨化世間，能動於大地。
成就出離道，超過煩惱海，
以諸功德財，隨意皆施與。
如來清淨戒，猶如於大地，
出生諸功德，無有愛憎想。
以智慧力故，了知諸法空，

眾生及壽者，分別不可得。

善了眾生性、心行及所趣，

為世作明燈，饒益於一切。

世間苦逼迫，漂溺於暴流，

常為諸眾生，起大精進力。

世尊離煩惱，生老及病死，

處世如虛空，一切無所染。

智慧大威光，能破一切闇，

永離貪瞋癡，我今稽首禮。」

佛告阿難：「賢壽菩薩所獲神通，從是已來不復退

失。於意云何？爾時賢壽豈異人乎！今此會中彌勒菩薩摩

訶薩是。」

阿難白佛言：「世尊！若彌勒菩薩久已證得無生法忍，何故不得阿耨多羅三藐三菩提耶？」

佛告阿難：「菩薩有二種莊嚴，二種攝取。所謂攝取眾生、莊嚴眾生，攝取佛國、莊嚴佛國。彌勒菩薩於過去世修菩薩行，常樂攝取佛國、莊嚴佛國。我於往昔修菩薩行，常樂攝取眾生、莊嚴眾生。然彼彌勒修菩薩行經四十劫，我時乃發阿耨多羅三藐三菩提心。由我勇猛精進力故，便超九劫。於賢劫中，得阿耨多羅三藐三菩提。

阿難！我以十法得證菩提。云何為十？一者、能施所愛之物；二者、能施所愛之妻；三者、能施所愛之子；四者、能施所愛之頭；五者、能施所愛之眼；六者、能施所愛王位；七者、能施所愛珍寶；八者、能施所愛血肉；九

者、能施所愛骨髓；十者、能施所愛支分。是名為十。我行此法，能得阿耨多羅三藐三菩提。

阿難！復有十法能證菩提。云何為十？一者、獲戒功德；二者、成就忍力；三者、發起精進；四者、得諸禪定；五者、有大智慧；六者、於諸眾生常不捨離；七者、於諸眾生起平等心；八者、於諸空法而常修習；九者、善能成就真實空性；十者、善能成就無相無願。是名為十。我行此法，能得阿耨多羅三藐三菩提。

阿難！彌勒菩薩往昔行菩薩道時，不能捨施手足頭目，但以善巧方便安樂之道，積集無上正等菩提。」

爾時阿難白佛言：「世尊！云何彌勒往昔行菩薩道時，但以善巧方便安樂之道，而能積集無上菩提？」

佛告阿難：「彌勒往昔行菩薩道，晝夜六時，偏袒右肩，右膝著地，合掌頂禮，於諸佛前說是偈言：

『我今歸命禮，十方一切佛，
菩薩聲聞眾，大仙天眼者。
亦禮菩提心，遠離諸惡道，
能得生天上，乃至證涅槃。
若我作少罪，隨心之所生，
今對諸佛前，懺悔令除滅。
我今身口意，所集諸功德，
願作菩提因，當成無上道。
十方國土中，供養如來者，
及佛無上智，我今盡隨喜。』

有罪悉懺悔，是福皆隨喜，
我今禮諸佛，願成無上智。
十方大菩薩，證於十地者，
我今稽首禮，願速證菩提。
得證菩提已，摧伏於魔軍，
轉清淨法輪，饒益眾生類。
常願住世間，無量俱胝劫，
擊於大法鼓，度脫苦眾生。
我沒於欲泥，貪繩之所繫，
種種多纏縛，願佛垂觀察。
眾生雖垢重，諸佛不厭捨，
願以大慈悲，度脫生死海。

現在諸世尊，過去未來佛，
所行菩薩道，我今願修學。
具足波羅蜜，成就六神通，
度脫諸眾生，證於無上道。
了知諸法空，無相無自性，
無住無表示，不生亦不滅。
又如大仙尊，善了於無我，
無補特伽羅，乃至無壽者。
於諸布施事，不執我我所，
為安樂眾生，施與無慳悋。
願我所施物，不假功用生，
觀察了知空，具施波羅蜜。

持戒無缺減，得佛淨尸羅，
以無所住故，具戒波羅蜜。
忍辱如四大，不生分別心，
以無瞋恚故，具忍波羅蜜。
願以身心力，發起大精進，
堅固無懈怠，具勤波羅蜜。
以如幻如化，及勇猛精進，
金剛等三昧，具禪波羅蜜。
願證三明智，入於三脫門，
了三世平等，具慧波羅蜜。
諸佛妙色身，光明大威德，
菩薩精進行，願我皆圓滿。

』

彌勒名稱者，勤修如是行，具六波羅蜜，安住於十地。」

佛告阿難：「彌勒菩薩安住如是善巧方便，積集阿耨多羅三藐三菩提。阿難！我昔求道受苦無量，乃能積集阿耨多羅三藐三菩提。何以故？

乃往古昔，時有太子，名見一切義，端正殊妙，諸相具足，見者歡喜。出遊園苑，見一病人受諸重苦，生悲愍心，便問之言：『汝今此病豈無有藥能療治耶？』

爾時病人，即以偈頌白太子言：

『我病藥難求，世間不可得，
國王亦無有，何況病惱者。
通達於諸論，善說醫方者，

雖欲為療治，其藥難可得。』

爾時太子，復以偈頌告病人言：

『金銀摩尼珠，乃至於象馬，

所求皆當說，為汝除憂惱。』

爾時病人，復以偈頌白太子言：

『若飲太子血，我必得安樂，

願生歡喜心，施我無憂惱。』

爾時太子，復以偈頌告病人言：

『我為諸眾生，墜墮無間獄，

多劫猶能忍，何況於身血。』

爾時太子，即取利刀刺身出血，令彼病人隨意所用，

不生一念悔恨之心。

阿難當知，爾時太子見一切義者，豈異人乎！今我身是。四大海水猶可測量，我於往昔行菩薩道，捨己身血不可稱計。」

佛告阿難：「乃往古昔，時有太子，名曰妙花，端正殊勝，諸相具足，見者歡喜。從園苑出，見一病人身體羸瘦，生悲愍心，便問之言：『汝今此病豈無有藥能療治耶？』」

爾時病人，即以偈頌白太子言：

『世雖有良醫，無藥療我病，
唯願生慈愍，為我除憂惱。』

爾時太子，即以偈頌告病人言：

『我為利世間，一切咸施與，

身分及珍寶，須者皆當說。』

爾時病人，復以偈頌白太子言：

『譬如大藥王，隨意療眾病，

亦如日月光，普照諸世間。

若能出身髓，遍塗於我身，

是病乃消除，長夜得安樂。』

爾時太子，復以偈頌告病人言：

『若有諸眾生，碎我身出髓，

為利於世間，心不生憂惱。』

爾時太子，即自碎身取其骨髓，與彼病人隨意所用，

不生一念悔恨之心。阿難當知，爾時妙花太子豈異人乎！

今我身是。四大海水猶可測量，我於往昔行菩薩道，捨身

骨髓不可稱計。」

佛告阿難：「乃往古昔，時有國王，名為月光，端正殊妙，諸相具足，見者歡喜。從園苑出，見一盲人貧窮乞匄，生悲愍心便問之言：『汝何所須？我當施汝。或飲食、衣服、莊嚴資具、金、銀、摩尼及諸珍寶，隨汝所欲，皆當與之。』」

爾時盲人，即以偈頌而白王言：

『大王猶日月，光明照世間，

具足勝功德，不久生天上。

一切淨妙色，我今悉不見，

願王起慈悲，施我所愛眼。』

爾時大王，即以偈頌告盲人言：

『汝速來取眼，令汝得安樂，願我當來世，得佛清淨眼。』

我行菩薩道，一切皆當捨；

若我不施汝，是則違本願。』

爾時月光王，即取利刀自挑其眼，與彼盲人隨意所用，不生一念悔恨之心。阿難當知，爾時月光王者豈異人乎！即我身是。須彌山王猶可度量，我於往昔行菩薩道，捨所愛眼不可稱計。

阿難！彌勒菩薩往修行菩薩道時，作是願言：『若有眾生薄婬怒癡，成就十善，我於爾時乃成阿耨多羅三藐三菩提。』

阿難！於當來世有諸眾生，薄婬怒癡，成就十善，彌

勒菩薩當爾之時，得阿耨多羅三藐三菩提。何以故？由彼菩薩本願力故。」

佛告阿難：「我於往昔行菩薩道，作如是言：『願我當於五濁惡世，貪瞋垢重諸惡眾生，不孝父母，不敬師長，乃至眷屬不相和睦，我於爾時，當成阿耨多羅三藐三菩提。』阿難！以是願故，我今所入城邑聚落，多有眾生毀罵於我，以斷常法招集眾會；若行乞食，全以塵土，和諸雜毒與我令食；或以女人誹謗於我。阿難！我於今者以本願力，為如是等諸惡眾生，起大悲心而為說法。」

爾時阿難白佛言：「世尊！如來應正等覺，能作難作，能忍難忍，不調伏者悉令調伏，荷擔如是罪垢眾生而為說法。」

佛告阿難：「如是如是，如汝所說。何以故？如來大悲之所攝故。」

爾時阿難白佛言：「世尊！我聞如來堅固誓願，身毛皆豎。世尊！當何名此經？我等云何受持？」

佛告阿難：「是經名為《彌勒所問》，亦名《往昔本願因緣》，以是名字，汝當受持。」

佛說是經已，彌勒菩薩，尊者阿難，一切世間天人、阿修羅、乾闥婆等，聞佛所說，皆大歡喜，信受奉行。

大寶積經彌勒菩薩所問會

一切智光明仙人慈心因緣不食肉經

失譯人名今附秦錄

如是我聞，一時佛住摩伽提國寂滅道場彌加女村自在天祠精舍，時有迦波利婆羅門子，名彌勒，軀體金色，三十二相八十種好，放銀光明，黃金校飾，如白銀山威光無量，來至佛所。

爾時世尊，與千二百五十比丘經行林中。又有結髮梵志五百人等，遙見彌勒威儀庠序，相好清淨，五體投地如銀山崩，成金花聚寶間廁，金花金臺七寶為果，於臺閣中有妙音聲，而說偈言：

「我見牟尼尊，面貌常清淨，
百福相奇特，世間無倫匹。」

煩惱垢永盡，智慧悉成滿，
一向常歸命，身心無疲倦，
故我以五體，欲得勝安樂，
脫苦無所畏，敬禮釋迦文。」

時諸梵志見聞此事，白佛言：「世尊！如此童子威儀庠序，光明無量，與佛無異。於何佛所初發道心？受持誰經？唯願天尊，為我解說。」

佛告式乾梵志：「汝今諦聽，善思念之，吾當為汝分別解說，令汝歡喜。」

乃往過去無量無邊阿僧祇劫時，有世界名勝花敷，佛號彌勒，恆以慈心四無量法教化一切。彼佛說經名《慈三昧光大悲海雲》，若有聞者，即得超越百億萬劫生死之

罪，必得成佛無有疑慮。

時彼國中有大婆羅門，名一切智光明，聰慧多智，廣博眾經，世間技藝六十四能無不綜練。聞佛出世，說《慈三昧光大悲海雲經》，即以世間一切義論難詰彼佛，盡其辭辯而不能屈，即便信伏為佛弟子，尋發阿耨多羅三藐三菩提心。而作是言：『我今於佛法中，誦持《大慈三昧光大悲海雲經》，以此功德，願於未來過算數劫，必得成佛，而號彌勒。』於是捨家，即入深山，長髮為相修行梵行，八千歲中少欲無事，乞食自活，誦持是經，一心除亂。

彼時世間有雨星現，國王姪荒，彗星橫流，連雨不止，洪水暴漲。仙人端坐不得乞食，經歷七日。

時彼林中有五百白兔，有一兔王，母子二獸見於仙人七日不食，而作是言：『今此仙人為佛道故，不食多日，命不云遠。法幢將崩，法海將竭，我今當為無上大法令得久住，不惜身命。』即告諸兔：『一切諸行皆悉無常，眾生愛身，空生空死未曾為法。我今欲為一切眾生作大橋梁，令法久住，供養法師。』

爾時兔王即為群兔，而說偈言：

『若有畜生類，得聞諸佛名，
永離三惡道，不生八難處。
若聞法奉行，生處常值佛，
信法無疑惑，歸依賢聖僧。
隨順諸戒行，如是疾得佛，

必至大涅槃，常受無上樂。」

爾時兔王說此偈已，告諸兔言：「我今以身欲供養法，汝等宜當各各隨喜。所以者何？我從多劫喪身無數，三毒所使，為鳥獸形，唐生唐死未曾為法，吾今欲為無上法故，棄捨身命，供養法師。」

時山樹神即積香薪，以火然之。

兔王母子圍遶仙人足滿七匝，白言：「大師！我今為法供養尊者。」

仙人告言：「汝是畜生，雖有慈心，何緣能辦？」

兔白仙人：「我自以身供養仁者，為法久住，令諸眾生得饒益故。」作此語已，即語其子：「汝可隨意求覓水草，繫心思惟，正念三寶。」

爾時兔子聞母所說，跪白母言：『如尊所說無上大法欲供養者，我亦願樂。』作此語已，自投火中，母隨後入。

當於菩薩捨身之時，天地大動，乃至色界及以諸天，皆雨天華，持用供養。

肉熟之後，時山樹神白仙人言：『兔王母子為供養故，投身火中，今肉已熟，汝可食之。』

時彼仙人聞樹神語，悲不能言，以所誦經書置樹葉，又說偈曰：

『寧當然身破眼目，不忍行殺食眾生。

諸佛所說慈悲經，彼經中說行慈者，寧破骨髓出頭腦，不忍噉肉食眾生。』

如佛所說食肉者，此人行慈不滿足，常受短命多病身，迷沒生死不成佛。」

時彼仙人說此偈已，因發誓言：「願我世世不起殺想，恆不噉肉，入白光明慈三昧，乃至成佛制斷肉戒。」作此語已，自投火坑與兔併命。

是時天地六種震動，天神力故，樹放光明，金色晃曜，照千國土。時彼國中諸人民等，見金色光從山樹出，尋光來至，既見仙人及以二兔死在火中，見所說偈并得佛經，持還上王。王聞此法，傳告共宣，令聞此者皆發無上正真道心。」

佛告式乾：「汝今當知，爾時白兔王者，今現我身釋迦文尼佛是。時兔兒者，今羅睺羅是。時誦經仙人者，今

此眾中婆羅門子彌勒菩薩摩訶薩是。我涅槃後五十六億萬歲，當於穰佉轉輪聖王國土，華林園中金剛座處龍華菩提樹下，得成佛道，轉妙法輪。時五百群兔者，今摩訶迦葉等五百比丘是。時二百五十山樹神者，舍利弗、目犍連等二百五十比丘是。時千國王，跋陀婆羅等千菩薩是。彼王國土諸人民等得聞經者，從我出世乃至樓至，於其中間受法弟子得道者是。」

佛告式乾：「菩薩求法，勤苦歷劫不惜身命，雖復從報受畜生身，常能為法，不惜軀命，投於火坑以身供養，便得超越九百萬億劫生死之罪。於是得在恆河沙等無量諸佛先，先彌勒前得成佛道，汝等云何不勤為法！」

佛說是語時，式乾等五百梵志求佛出家。佛言：「善

來。」鬚髮自落，即成沙門。佛為說法，豁然意解成阿羅漢，八萬諸天亦發阿耨多羅三藐三菩提心。時會大眾聞佛所說，各各稱讚菩薩所行。

舍利弗白佛言：「時彼仙人投火坑已，為生何處？」佛告舍利弗：「時彼仙人投火坑已，生於梵世，普為一切說大梵法，乃至成佛轉大梵輪，所說經典亦名《慈三昧光大悲海雲》，所制波羅提木叉，不行慈者名犯禁人，其食肉者犯於重禁，後身生處常飲熱銅。至彼仙人得作佛時，如《彌勒菩薩下生經》說。」

尊者阿難，聞佛所說，即從坐起，偏袒右肩，右膝著地，合掌向佛，叉手長跪，而白佛言：「世尊！彌勒成佛所說戒法，乃以慈心制不食肉，為犯重禁，甚奇甚特。」

時會大眾異口同音，皆共稱讚：「彼國眾生不食肉戒，願生彼國。」世尊悉記：「當得往生。」

尊者阿難復白佛言：「當何名此經？云何受持之？」佛告阿難：「此法之要，名《白兔王菩薩不惜身命為無上道》，亦名《一切智光明仙人慈心因緣不食肉經》，如是受持。」

尊者阿難及諸比丘，聞佛所說歡喜奉行。

一切智光明仙人慈心因緣不食肉經

賢愚因緣經波婆離品

元魏涼州沙門慧覺等在高昌郡譯

如是我聞，一時佛在王舍城，鷲頭山中，與尊弟子千二百五十人俱。

爾時波羅奈王，名波羅摩達。王有輔相，生一男兒，三十二相，眾好備滿，身色紫金，姿容挺特。輔相見子，倍增怡悅，即召相師令占相之。

相師披看，歎言：「奇哉！相好畢滿，功德殊備，智辯通達，出踰人表。」輔相益喜。

因為立字，相師復問：「自從生來，有何異事？」

輔相答言：「甚怪異常。其母素性不能良善，懷妊已來，悲矜苦厄，慈潤黎元，等心護養。」

相師喜言：「此是兒志。」因為立字，號曰彌勒。父母喜慶，心無有量。

其兒殊稱，合土宣聞。國王聞之，懷懼言曰：「念此小兒，名相顯美，儻有高德，必奪我位。曼其未長，當豫除滅，久必為患。」

作是計已，即勅輔相：「聞汝有子，容相有異，汝可將來，吾欲得見。」

時宮內人聞兒暉問，知王欲圖，甚懷湯火。其兒有舅，名波婆梨，在波梨弗多羅國，為彼國師。聰明高博，智達殊才，五百弟子恆逐諮稟。

於時輔相憐愛其子，懼被其害。復作密計，遣人乘象送之與舅。

舅見彌勒，觀其色好，加意愛養，敬視在懷。其年漸大，教使學問，一日諮受，勝餘終年，學未經歲，普通經書。

時波婆梨見其外甥兒，學既不久，通達諸書，欲為作會顯揚其美，遣一弟子至波羅奈語於輔相，說兒所學，索於珍寶，欲為設會。其弟子往至於中道，聞人說佛無量德行，思慕欲見，即往趣佛。未到中間，為虎所噉，乘其善心，生第一四天。

波婆梨自竭所有合集財賄，為設大會。請婆羅門一切都集，供辦餽饍種種甘美，設會已訖，大施嗟嘆，一人各得五百金錢。布施訖竟，財物罄盡。

有一婆羅門，名勞度差，最於後至，見波婆梨：「我

從後來，雖不得食，當如比例與我五百金錢。」

波婆梨答言：「我物已盡，實不從汝有所愛也。」

勞度差言：「聞汝設施，有望相投，云何空見不垂施惠？若必拒逆不見給者，汝更七日頭破七段。」

時波婆梨聞是語已，自思惟言：「世有惡呪及餘蠱道，事不可輕。儻能有是，財物悉盡，卒無方計。」念是愁憂，深以為懼。

前使弟子終生天者，遙見其師愁悴無賴，即從天下，來到其前，問其師言：「何故愁憂？」師具以事廣說因緣。

天聞其語，尋白師言：「勞度差者未識頂法，愚癡迷網惡邪之人，竟何所能？而乃憂此。今唯有佛最解頂法，

無極法王，特可歸依。」

時波婆梨聞天說佛，即重問之：「佛是何人？」

天即說：「佛生迦毘羅衛淨飯王家，右脅而生，尋行七步，稱天人尊。三十二相，八十妙好，光照天地，梵釋侍御。三十二瑞，振動顯發。相師觀見，記其兩處，在家當作轉輪聖王，出家成佛。覩老病死，不樂國位，踰宮出國。六年苦行，菩提樹下破十八億魔，於後夜中普具佛法，三明、六通、十力、無畏、十八不共悉皆滿備。至波羅奈初轉法輪，阿若憍陳如五人漏盡，八萬諸天得法眼淨，無數天人發大道意。復到摩竭，度鬱毘羅，并舍利弗、目健連等，出千二百五十比丘以為徒類，號曰眾僧。功德智能不可稱計。總而言之，名為佛也。今在王舍鷲頭

山中。」

時波婆梨聞歎佛德，自思惟言：「必當有佛！我書所記：佛星下現，天地大動，當生聖人。今悉有此，似當是也。」

即勅彌勒等十六人：「往見瞿曇，看其相好。眾相若備，心念難之：我師波婆梨為有幾相？」

如我今者，身有兩相。一、髮紺青，二、廣長舌。

若其識之，復更心難：我師波婆梨年今幾許？

如我年者，今百二十。

若其知之，復更心念：我師波婆梨是何種姓？

欲知我種，是婆羅門。

若其答識，復更心難：我師波婆梨有幾弟子？

如我今者，有五百弟子。

若答知數，斯必是佛。汝等必當為其弟子，令遣一人語我消息。」

時彌勒等進趣王舍，近到鷲頭山，見佛足跡，千輻輪相晒然如畫，即問人言：「此是誰跡？」

有人答言：「斯是佛跡。」

時彌勒等遂懷慕仰，徘徊跡側，豫欽渴仰。

時有比丘尼剎羅，持一死蟲著佛跡處，示彌勒等：「各共看此，汝等欽羨歎慕斯跡，躡殺眾生，有何奇哉？」

彌勒之等各共前看，諦觀形相是自死蟲，即問比丘尼：「汝誰弟子？」

比丘尼答言：「是佛弟子。」

時彌勒等各自說言：「佛弟子中乃有是人。」

漸進佛所，遙見世尊光明顯照，眾相赫然，即數其相，不見其二。佛即為其出舌覆面，復以神力令見陰藏。見相數滿，益以歡喜。即奉師勅，遙以心難：「我師波婆梨為有幾相？」

佛即遙答：「汝師波婆梨唯有二相。一、髮紺青，二、廣長舌。」

聞是語已，復更心難：「我師波婆梨年今幾許？」

佛遙答言：「汝師波婆梨年百二十。」

既聞是已，復心念難：「我師波婆梨是何種姓？」

佛即遙答：「汝師波婆梨是婆羅門種。」

得聞是已，復更心難：「我師波婆梨有幾弟子？」

佛即遙答：「汝師波婆梨有五百弟子。」

於時會者，聞佛所說，甚怪如來獨說此語。時諸弟子長跪問佛：「世尊何故而說是言？」

佛告比丘：「有波婆梨，在波婆梨弗多羅國，遺十六弟子來至我所，試觀我相。因心念難，是以一一還以答之。」

時彌勒等聞佛答難，事事如實，一無差違，深生敬仰。往至佛所，頭面禮訖，却坐一面。佛為說法，其十六人得法眼淨，各從座起求索出家。佛言：「善來！」鬚髮自墮，法衣在身，尋成沙門。重以方便為其說法，其十五人成阿羅漢。

時彌勒等自共議言：「波婆梨師在遠悒遲，宜時遣人還白消息。」

十六人中，時有一人字賓祈奇，是波婆梨姊妹，眾人即遣往白消息。還到本國波婆梨所，具以聞見廣為說之。

波婆梨聞已，喜發於心，即從坐起，長跪合掌，向王舍城，自說誠言：「生遭聖世，甚難值遇，思覩尊容，稟受清化。年已老邁，足力不強，雖有誠欸，靡由自達。世尊大慈，豫知人心，唯願屈神，來見接濟。」

於時如來遙知其意，屈伸臂頃，來到其前。禮已舉頭，尋見世尊，驚喜踊躍，禮拜問訊，請令就坐，恭肅侍佛。佛為說法，逮阿那含。於時世尊尋還鷲頭山。

時淨飯王聞佛道成，遊行教化，多有所度，情懷渴

仰，思得覩觀。告優陀耶：「汝往佛所，騰我志意，白於悉達：『汝本有要，得道當還，願遵往言，時來相見。』」優陀耶到，具宣王意。

佛尋可之，七日當往。

優陀耶喜，還白消息。淨飯王聞，告語諸臣：「優陀耶來，云佛當還。莊嚴城內，極令清潔，塗汙街陌，遍豎幢幡，饒儲華香，當俟供養。」嚴辦已訖，與諸群臣，四十里外奉迎世尊。

於時如來與大眾俱，八金剛力士住在八面，時四天王各在前導，時天帝釋與欲界諸天侍衛其左，時梵天王與色界天侍衛其右，諸比丘僧列在其後，佛在眾中，放大光明，暉曜天地，威踰日月，普與大眾乘虛而往，漸欲近

王，下齊人頭。王與臣民夫人嫫女，觀見大眾，晃朗俱顯，佛在中央，如星中月。王大歡喜，不覺下禮，禮畢問訊，與共還國，住尼拘盧陀僧伽藍。

是時國法，男女有別。王與臣民日日聽法，聞法開悟，得度者眾。諸女人輩各懷怨恨：「佛與大眾雖復還國，男子有幸，獨得見聞。我曹女人不蒙恩祐。」

佛知其意，即語王言：「自今已後，令國男女番休聽法，一日一更。」從是已後，蒙度甚多。

時佛姨母摩訶波闍波提，佛已出家，手自紡織，預作一端金色之氎，積心係想，唯俟於佛。既得見佛，喜發心髓，即持此氎奉上如來。

佛告憍曇彌：「汝持此氎，往奉眾僧。」

時波闍波提重白佛言：「自佛出家，心每思念，故手紡織，規心俟佛。唯願垂愍，為我受之。」

佛告之曰：「知母專心欲用施我，然恩愛之心，福不弘廣。若施眾僧，獲報彌多。我知此事，是以相勸。」佛又言曰：「若有檀越，於十六種具足別請，雖獲福報，亦未為多。何謂十六？比丘、比丘尼各有八輩。不如僧中漫請四人，所得功德，福多於彼，十六分中未及其一。將來末世法垂欲盡，正使比丘畜妻俠子，四人以上名字眾僧，應當敬視如舍利弗、目犍連等。」

時波闍波提心乃開解，即以其衣奉施眾僧。僧中次行，無欲取者。到彌勒前，尋為受之。

於後世尊與比丘僧遊波羅奈，轉行化導。

爾時彌勒著金色氎衣，身既端正，色紫金容，表裏相稱。威儀詳序，入波羅奈城。欲行乞食，到大陌上擎鉢住立，人民之類覩其色相，圍遶觀看，無有厭足。雖皆欽敬，無能讓食。

有一穿珠師，偶到道宕，見於彌勒，甚懷敬慕。即問大德：「為得食未。」

答言：「未得。」

尋請將歸，辦設飲食。食已澡漱，為說妙法。言辭高美，聽之無厭。

時有大長者值欲嫁女，先與一珠，雇令穿之，若其穿訖，當與錢十萬。於時長者遣人來索。珠師聞法，五情甘樂。語言：「且去！比後當穿。」其人復語：「今急須

之，念時著手。」囑已還去，具語長者：「斯須之頃。」重遣往索，猶故聽法，未為穿之，還語長者。長者恨言：「既重相雇，不唐倩託，今乃前却，不稱我要。」更重遣人，因齎錢往，若其未穿，還擔珠來。使人到問，猶故聽法，知未穿珠，急從還索。事不得已，即取還他。

穿珠之師，在彌勒前次第聽法，心無厭退。

其妻瞋恚，嫌責夫言：「須臾之勞，當得錢十萬，以供家中衣食乏短。但聽沙門浮美之談，亡失爾許錢財之利。」夫聞其言，情懷悔恨。

彌勒知意，而語之言：「汝今能共至精舍不？」

答言：「可爾。」即時共到精舍。

將到僧中，問眾僧言：「若有檀越，請一持戒清淨沙

門，就舍供養，所得盈利，何如有人得十萬錢？」

時憍陳如尋即說言：「假使有人得百車珍寶，計其福利，不如請一淨戒沙門就舍供養，得利弘多。」

舍利弗言：「設令有人得一閻浮提滿中珍寶，猶不如請一淨戒者就舍供養，獲利彌多。」

目犍連言：「正使有人得二天下滿中七寶，實不如請一清淨沙門於舍供養，得利極多。」

其餘比丘，如是各各引於方喻，比按其利，皆悉多彼。

時阿那律復自說言：「正令得滿四天下寶，其利猶復不如請一清淨沙門詣舍供養，得利殊倍。所以然者？我是其證。」

自念過去九十一劫時，世有佛，號毘婆尸。般涅槃後，經法滅盡。時閻浮提有一大國，名波羅奈。

爾時國中有一薩薄，家居巨富，無所乏少。有二男兒，各皆端正，長名淚吒，小字阿淚吒。父垂命終，告勅二子：『我必不免，當即後世。汝等兄弟念相承奉，合心并力，慎勿分居。所以然者？譬如一絲不任繫象，合集多絲乃能制象；譬如一葦不能獨燃，合捉一把燃不可滅。今汝兄弟亦復如是，共相依恃，外人不壞；內穆懃家，則財業日增。』囑誡之後，氣絕命終。

兄弟奉教，合居數時。後阿淚吒婦，自心念言：『今共居止，逼難兄家，人客知識不得瞻待。若當分異，各自努力，情既無難，可自成家。』念是事已，具向夫說。阿

淚吒聞婦所言，以為不可。婦復慇懃，廣引道理。阿淚吒情迴，以事白兄。兄復引父垂命之言，廣示方比不可之理。時阿淚吒婦數數勸夫，其夫意決，急求分居。兄見意盛，與分家居。

分異之後，阿淚吒夫妻恣情放志，招合伴黨，飲噉奢侈，不順禮度。未經幾年，家物耗盡，窮罄無計。詣兄勾之，兄復矜之，與錢十萬；用盡更索。如是六返，前後凡與六十萬錢。後復來求，兄復呵責：『亡父勅誡汝不承用，未經幾時求共分異，喪用無度，不可供給。前後與汝六十萬錢，汝不知足，復更來求。今復更與汝十萬錢，能有能無，更勿來索。』其弟得責，慚愧取錢，夫婦改操，謹身節用，懃心家業，財產日廣。其後漸富，更無乏短。

其兄淚吒連遭衰艱，所在破亡，財物迸散，家理頓窮無有方計。往到弟邊，說所契闊，求索少錢，供足不逮。其弟瞋嫌而語兄言：『謂望兄家，不識有貧，云何復來從我所索？』作是語已，乃不讓食，兄便還去而自愕然。『生死之中，何可畏耶？析體兄弟，不識恩養，豈況他人。』當推義理，心即厭世，捨家入山，靜坐思惟諸法生滅，心即開悟，成辟支佛，威儀可觀。入城乞食。後值歲儉，人民飢乏。時辟支佛乞食難得。

時弟阿淚吒後轉貧窮，復值歲荒，食穀不繼，日往取薪，賣糴稗子，共家婦兒以自供活。一日晨朝，早往入澤，於城門中見辟支佛，威儀可觀。入城乞食。即往取薪，還來到門，見辟支佛空鉢而出，心自生念：『此是快

士，晨見入城，今乃空來。若今與我共歸至舍，當共分食以奉施之。』作是念已，捨之而去。

時辟支佛尋知其意，即隨其後，往到門中。阿淚吒見之，心用歡喜，即為敷床，請令入坐。索其自分稗子之糜，躬手自持，施辟支佛。

時辟支佛語阿淚吒言：『汝亦飢渴，當共分噉。』

阿淚吒白言：『我曹世俗，食無時節。尊日一食，但願為受。』即受食訖。感其至心，遭斯歲儉，父子不救，能割身分以用見施，當為現變令其歡喜。即飛虛空，身出水火，廣現神足，還住其前，語阿淚吒言：『欲求何願？恣隨汝意。』見變歡喜踊躍，即前至心自立誓言：『一切眾生多種求財，我願世世莫有所乏，情有所欲，應意而

至。又願將來得遇上士，功德勝汝百千萬倍，令我於彼得漏盡證神足變化，與汝不異。』求願已訖，倍復歡喜。時辟支佛還歸所止。

時阿淚吒即還入澤取薪，到見一兔，意欲捕取。走逐轉近，以鎌遙擲，即時墮地。適欲前取，化為死人上其背上，急抱其頭。盡力推却，不能令却。心懷恐怖，悵惶苦惱，意欲入城，共婦解却。復恐人見令不聽入，留待日暮，以衣用覆，擔負入城往趣其舍。已到舍內，自然墮地，變成一聚閻浮檀金，光明晃昱，并照比舍。展轉談之，上徹於王，王即遣人往看審實。

使人到觀，見是死人，尋還白王：『是死人耳。』王問餘人，猶言是金，甚怪所以，重遣人看。如是七

返，來言不定，王即自往。

親往看之，見是死人，形漸欲臭。即問阿淚吒：『汝見是何？』

答言：『看實是金。』即取少許用奉於王。

王見金色，敬之未有，問其所由：『何緣得此？』

於時阿淚吒，具以本末向王而說：『必當由施辟支佛故。』

王聞其語，歎言：『善哉！汝得快利，值此上人。』即更賜與，拜為大臣。

如是諸尊，彼阿淚吒者，即我身是。我於彼世以少穉糜施辟支佛，因自求願。緣是以來，九十一劫生天人中，無所乏少。三事挺特，端正受稱，情有所欲應意而至。乃

至今身在家之時，我常優遊，不喜世務。兄摩訶男常有怨辭。

我母語言：『我兒福德。』

摩訶男言：『我獨勞慮，家理田業。優閑臥食，云何福德？』

其母欲試，遣我至田，監臨種作，令不送食。我怪食遲，遣人往索，母遣人語我云：『無所有。』

我還白母：『唯願與我，送無所有。』

於時其母聞兒是語，即取寶案嚴具器物，以襪覆上，送以與我。令摩訶男逐而看之。已到我前，發去其襪，百味飲食案器悉滿。如是餘時，在所應意。

若令滿得四天下寶，劫盡之時，理當消滅，復不得

久。如是我以少糜施辟支佛，九十一劫福利未減，復緣斯德，見佛度苦。以是之故，故知請一淨戒比丘於舍供養，得利多彼四天下寶。」時阿那律說是語已。

於時世尊從外來入，聞阿那律說過去事，告諸比丘：「汝等比丘說過去事，我復次說當來之世。此閻浮提土地方正，平坦廣博，無有山川。地生濡草，猶如天衣。爾時人民壽八萬四千歲，身長八丈，端正殊妙，人性仁和，具修十善。彼時當有轉輪聖王，名曰勝伽。彼時當有婆羅門家，生一男兒，字曰彌勒。身色紫金，三十二相，眾好畢滿，光明殊赫。出家學道，成最正覺，廣為眾生轉尊法輪。其第一大會，度九十三億眾生之類；第二大會，度九十六億；第三大會，度九十九億。如是比丘，三會說法得

蒙度者，悉我遺法種福眾生，或三寶中興供養者，出家在家持齋戒者，燒香燃燈禮拜之者，皆得在彼三會之中。三會度我遺殘眾生，然後乃化同緣之徒。」

於時彌勒聞佛此語，從座而起，長跪白佛言：「願作彼彌勒世尊。」

佛告之曰：「如汝所言，汝當生彼為彌勒如來，如上教化，悉是汝也。」

於時會中有一比丘，名阿侍多，長跪白佛：「我願作彼轉輪之王。」

佛告之曰：「汝但長夜貪樂生死，不規出耶！」

於時在會一切大眾，見佛世尊授彌勒決當來成佛，猶字彌勒，各皆有疑，欲知本末。

尊者阿難即起白佛：「彌勒成佛，復字彌勒。不審從何造起名字？」

佛告阿難：「諦聽著意。過去無量阿僧祇劫，此閻浮提有一大國，王名曇摩留支，領閻浮提八萬四千國，六萬山川，八十億聚落，二萬夫人嫫女，一萬大臣。

有一小國豐樂，是中國王名波塞奇。時弗沙佛初出於世，在此國中化導眾生。時波塞奇王與諸群臣，專供養佛及於眾僧，不暇得往朝覲大王，貢獻音信亦悉斷替。於時大王怪其間絕，即遣使者往責所以。使者到已，宣王言令：『比年已來，人信俱斷，汝為人臣，何以違常。將有異心？欲懷逆耶？』

時波塞奇得大王教，自知違替，靡知所如，即往見

佛，白如是事。

佛告王言：『汝勿憂慮，但還遣使以誠告言：佛在我國，朝夕承事，是以不暇往覲大王。國內財物供佛及僧，無有遺餘可以獻貢。』波塞奇王得佛教已，即還報使，如佛所語。

使到見王，具道其意。大王聞之，甚懷盛怒，即合諸臣共詳此事。諸臣皆言：『彼王傲慢，橫引道理，宜合兵眾往攻伐之。』王即然之，合兵躬往。

前軍近到，彼王乃知，心懷怖懼，急往白佛。

佛告王言：『莫用憂慮，但自往見，宣說前語。』

波塞奇王即與群臣往到界上，見於大王，禮問畢訖，住在一面。

大王責問：『汝何所恃，違慢失常，不來朝覲？』

波塞奇言：『佛世難值，甚難得覩，頃來在國，化導民物，朝夕侍奉，故使違替。』

於時大王復更重責：『正使令爾，何以斷獻？』

波塞奇言：『佛有徒眾，名曰眾僧，戒德清淨，世良福田，合國所有常用供養，無有盈長可以為貢。』

曇摩留支聞此語已，告言：『且住，須我見佛。見佛來還，乃問汝罪。』即與群臣往至佛所。

是時如來大眾圍遶，各悉靜然端坐入定。有一比丘入慈三昧，放金光明，如火聚。曇摩留支遙見世尊，光明顯赫，明曜踰日，大眾圍遶，如星中月。為佛作禮，問訊如法。見此比丘光明特顯，即白世尊：『此一比丘入何等

定？光曜乃爾。」

佛告大王：『此比丘者入慈等定。』

王聞是語，倍增欽仰，言：『此慈定巍巍乃爾，我會當習此慈三昧。』作是願已，志慕慈定，意甚柔濡，更無害心。即時請佛及比丘僧：『唯願迴神，往至大國。』佛即許可，剋日當往。

波塞奇王聞佛欲往至大王國，甚懷戀恨，愁悸無繆。心自念言：『若當令我是大王者，如來則當常住我國。由我小故，不得自在。』念是事已，即問佛言：『諸王之中，何者最大？』

佛告之曰：『轉輪王大。』

波塞奇王因自作願：『願我由來供養佛及眾僧，持此

功德，誓願將來世世，常作轉輪之王。」

如是阿難，爾時大王曇摩留支者，今彌勒是。始於彼世發此慈心，自此以來，常字彌勒。彼波塞奇王，今祇陀是。乃於彼中常作轉輪王，自是以來世世恆作，乃至今日功德不盡，是以今日復求索作。

時穿珠師聞說是已，尋發無上正真道意。其餘會者聞佛所說，有得須陀洹、斯陀含、阿那含、阿羅漢者，有發無上正真道意者，有得遷住不退地者，各皆敬戴，歡喜奉行。

賢愚因緣經波婆離品

佛說彌勒菩薩發願王偈

內閣掌譯西番蒙古諸文西番學總管儀賓工布查布譯

梵語阿_喇鴉黑_厄喇巴呢_{哈達}阿納喇_{阿雜阿}

華言聖彌勒願王。

敬禮一切諸佛菩薩摩訶薩。

佛告阿難：「夫彌勒菩薩摩訶薩，往昔誓行菩提行時，晝夜六時，偏袒右肩，右膝著地，合掌恭敬，而發如是願文：

敬禮一切佛，及具天眼仙，

菩薩摩訶薩，并諸聲聞眾。

令避惡趣隧，而示涅槃路，

引入無老死，敬禮菩提心。

我由無明心，所作一切罪，
今於佛面前，懺悔盡無餘。
自我三業門，所積資糧福，
是我普慧種，願我道無盡。
十方諸國中，所有供養佛，
佛昔隨喜者，我今皆隨喜。
懺悔一切罪，隨喜諸善根，
敬禮一切佛，願得大智慧。
十方一切處，所有大菩薩，
止於十地者，請速等正覺。
既證圓覺心，降伏諸魔軍，
為利諸有情，願請轉法輪。

以大法鼓音，度眾生苦際，
願經無量劫，常住世說法。
祈運大悲智，慈濟諸有情，
陷溺貪欲澤，恩愛所纏縛，
眾生被障礙，諸佛不憎捐，
慈悲諸含識，拔出三有海。
一切三世佛，所行諸道法，
我今皆隨學，願證菩提道。
同登六彼岸，度六道眾生，
證得六神通，願成無上道。
無生及本源，無處無自性，
悟此真空理，無智亦無得，

無命無眾生，無背無取向，
願達無我法，即等大仙佛。
願不住二執，所攝一切物，
為利益眾生，不悞行布施。
物種侈靡盛，我應用豐足，
物性等空寂，圓滿布施度。
所受止作品，無瑕最清淨，
及無癡矜慢，圓滿戒律度。
如地水火風，四大無觸背，
侵犯靡瞋恨，圓滿忍辱度。
發心始終勤，恆喜不懈弛，
身心勇猛力，圓滿精進度。

調伏正定聚，如幻三摩地，
金剛禪那等，圓滿靜慮度。
三種解脫門，三時平等法，
聞思修明了，圓滿智慧度。
諸佛所稱讚，熾盛光赫奕，
勤修菩薩行，圓滿自他志。
行此菩提道，名稱慈氏子，
圓滿六度行，超於十地位。
我以此善願眾生，命終速往兜率宮，
受生皆於見法閣，即為慈氏之長子。
十地自在降閻浮，證得十力大位時，
願受妙法甘露味，圓滿佛行盡無餘。

從此命終承願力，即得上生兜率天，
忻慶奉事慈氏尊，速得承授菩提記。」

阿難！當知慈氏菩薩摩訶薩，如此以實善巧修淨行業，道路平順，而獲無上菩提，成等正覺，成就真實大方便門。」

佛說彌勒菩薩發願王偈

按：此經於漢藏未見，而番本亦無出。然西國諸賢頗有註解，且普同作為恆常功課。與華嚴行願品，三十五佛行願品，稱為三種大懺願。愚略擬之。蓋初自梵文譯時，或於彌勒上生下生等經，節取切要者也（多分唐竺法護所譯《彌勒菩薩下生經》相近）。今時海內清寧，三教並盛，資用不乏，人民向善者多。近來常聞修建龍華會者，憶為或有欲持誦者，因特譯出漢文，便於信氏誦讀仰祈。

聖慈加護廣布流通為願焉。

乾隆八年正月吉日翻竟於廣仁彌勒院

大阿羅漢難提蜜多羅所說法住記

大唐三藏法師玄奘奉詔譯

如是傳聞，佛薄伽梵般涅槃後八百年中，執師子國勝軍王都，有阿羅漢，名難提蜜多羅（唐言慶友）。具八解脫、三明、六通、無諍、願智、邊際定等，無量功德皆悉具足，有大威神，名稱高遠。以願智力，能知此界一切有情種種心行，復能隨順作諸饒益。

化緣既畢，將般涅槃，集諸苾芻、苾芻尼等，說己所證諸妙功德，及應所行利樂有情，諸勝事業皆悉成辦。告時眾曰：「自今已後無復所為，唯無餘依是所歸趣。仁等當知！有疑可問。」

時諸大眾聞是語已，舉聲號哭，不能自持宛轉於地。

或起唱言：「佛薄伽梵久已涅槃，諸聖弟子亦隨寂滅，世間久空，無真調御。今唯尊者為天人眼，如何復欲棄捨我等？願垂哀愍，少留壽命。」

尊者慶友慰喻眾言：「不須啼泣。仁等當知！世間法爾有生必滅。諸佛如來降伏四魔，於壽自在，隨順世故，猶示涅槃。況我今者豈宜恆住。設隨汝請，亦無利益，當體此意，勿生憂惱。但有疑者，應可速問。」

諸苾芻等雖承告示，猶增涕噎，良久乃問：「我等未知世尊釋迦牟尼無上正法當住幾時？」

尊者告曰：「汝等諦聽，如來先已說法住經，今當為汝粗更宣說。佛薄伽梵般涅槃時，以無上法付囑十六大阿羅漢并眷屬等，令其護持，使不滅沒。及勅其身與諸施主

作真福田，令彼施者得大果報。」

時諸大眾聞是語已，少解憂悲，復重請言：「所說十六大阿羅漢，我輩不知，其名何等？」

慶友答言：「第一尊者名賓度羅跋囉惰闍，第二尊者名迦諾迦伐蹉，第三尊者名迦諾迦跋釐墮闍，第四尊者名蘇頻陀，第五尊者名諾距羅，第六尊者名跋陀羅，第七尊者名迦理迦，第八尊者名伐闍羅弗多羅，第九尊者名戍博迦，第十尊者名半託迦，第十一尊者名囉怛羅，第十二尊者名那伽犀那，第十三尊者名因揭陀，第十四尊者名伐那婆斯，第十五尊者名阿氏多，第十六尊者名注荼半託迦。如是十六大阿羅漢，一切皆具三明、六通、八解脫等無量功德，離三界染，誦持三藏，博通外典。承佛勅故，以神

通力延自壽量，乃至世尊正法應住，常隨護持。及與施主作真福田，令彼施者得大果報。」

爾時苾芻、苾芻尼等，復重請言：「我等不知十六尊者多住何處，護持正法，饒益有情？」

慶友答言：「第一尊者與自眷屬千阿羅漢，多分住在西瞿陀尼洲。第二尊者與自眷屬五百阿羅漢，多分住北方迦濕彌羅國。第三尊者與自眷屬六百阿羅漢，多分住在東勝身洲。第四尊者與自眷屬七百阿羅漢，多分住在北俱盧洲。第五尊者與自眷屬八百阿羅漢，多分住在南瞻部洲。第六尊者與自眷屬九百阿羅漢，多分住在耽沒羅洲。第七尊者與自眷屬千阿羅漢，多分住在僧伽茶洲。第八尊者與自眷屬千一百阿羅漢，多分住在鉢刺拏洲。第九尊者與自

眷屬九百阿羅漢，多分住在香醉山中。第十尊者與自眷屬千三百阿羅漢，多分住在三十三天。第十一尊者與自眷屬千一百阿羅漢，多分住在畢利颺瞿洲。第十二尊者與自眷屬千二百阿羅漢，多分住在半度波山。第十三尊者與自眷屬千三百阿羅漢，多分住在廣脇山中。第十四尊者與自眷屬千四百阿羅漢，多分住在可住山中。第十五尊者與自眷屬千五百阿羅漢，多分住在鷲峯山中。第十六尊者與自眷屬千六百阿羅漢，多分住在持軸山中。

諸仁者！若此世界一切國王、輔相、大臣、長者、居士，若男若女，發殷淨心，為四方僧設大施會；或設五年無遮施會；或慶寺、慶像、慶經幡等施設大會；或延請僧至所住處，設大福會；或詣寺中經行處等，安布上妙諸坐

臥具，衣藥飲食奉施僧眾。時此十六大阿羅漢，及諸眷屬，隨其所應分散往赴，現種種形，蔽隱聖儀，同常凡眾密受供具，令諸施主得勝果報。如是十六大阿羅漢，護持正法，饒益有情。

至此南瞻部洲人壽極短至於十歲，刀兵劫起，互相誅戮，佛法爾時當暫滅沒。刀兵劫後，人壽漸增至百歲位，此洲人等厭前刀兵殘害苦惱，復樂修善。

時此十六大阿羅漢，與諸眷屬復來人中，稱揚顯說無上正法，度無量眾，令其出家，為諸有情作饒益事。

如是乃至此洲人壽六萬歲時，無上正法流行世間熾然無息。後至人壽七萬歲時，無上正法方永滅沒。時此十六大阿羅漢，與諸眷屬，於此洲地俱來集會。以神通力，用

諸七寶造窠堵波，嚴麗高廣，釋迦牟尼如來應正等覺所有遺身馱都皆集其內。爾時十六大阿羅漢，與諸眷屬，繞窠堵波，以諸香花持用供養，恭敬讚歎，繞百千匝，瞻仰禮已，俱昇虛空，向窠堵波作如是言：『敬禮世尊釋迦如來應正等覺，我受教勅護持正法，及與天人作諸饒益，法藏已沒，有緣已周，今辭滅度。』說是語已，一時俱入無餘涅槃，先定願力，火起焚身，如燈焰滅，骸骨無遺。時窠堵波便陷入地，至金輪際方乃停住。爾時世尊釋迦牟尼無上正法，於此三千大千世界永滅不現。

從此無間，此佛土中有七萬俱胝獨覺一時出現，至人壽量八萬歲時，獨覺聖眾復皆滅度。

次後彌勒如來應正等覺出現世間，時瞻部洲廣博嚴

淨，無諸荆棘谿谷堆阜，平正潤澤，金沙覆地，處處皆有清池茂林，名花瑞草及眾寶聚，更相輝映，甚可愛樂。人皆慈心，修行十善。以修善故，壽命長遠豐樂安隱。士女殷稠，城邑隣次，鷄飛相及。所營農稼，一種七穫，自然成實，不須耘耨。

諸仁者！於彼時中，國界莊嚴、有情果報陳之難盡，具如彌勒成佛經說。

彌勒如來成正覺已，為聲聞眾三會說法，令出生死，得證涅槃。第一會度九十六俱胝聲聞眾，第二會度九十四俱胝聲聞眾，第三會度九十二俱胝聲聞眾。

若諸國王、大臣、長者、居士、男女、一切施主，於今釋迦牟尼佛正法中，能為佛事，自種善根，或教他種。

謂以七寶、金、銀、真珠、璧玉、香材、鑰石、銅鐵、木石、泥漆，或以繒縷，或以綵畫，作佛形像及窣堵波，若大若小，乃至最小如指節量；或以香花諸妙供具，若多若少而為供養。彼由如是善根力故，至彌勒如來成正覺時，善得人身，於彼佛第一會中，以淨信心捨俗出家，剃除鬚髮，披著法服，既預聖眾，隨宿願力便得涅槃。是名第一為佛事故，種善根者所得果報。

若諸國王及以臣庶一切施主，於今釋迦牟尼佛正法中，能為法事，自種善根，或教他種。謂於大乘素咀纜藏，所有甚深空性相應諸大乘經，謂般若波羅蜜多經、妙法芬陀利迦經、金光明經、金剛手藏經、首楞伽摩三摩地經、幻喻三摩地經、大神變三摩地經、集諸功德三摩地

經、還如來智印三摩地經、具諸威光三摩地經、寶臺經、集諸菩薩三摩地經、諸佛攝受經、集請問經、梵王問經、善吉問經、勇猛問經、能滿問經、海龍王問經、無熱惱龍王問經、樹幢龍王問經、寶掌問經、寶髻問經、虛空音問經、虛空吼問經、幻網問經、寶女問經、妙女問經、善臂問經、師子問經、猛授問經、金光女問經、說無盡慧經、說無垢稱經、未生怨王經、諦實經、那羅延經、佛花嚴經、蓮華手經、十佛名經、無量光眾經、極樂眾經、集淨華經、大集經、入一切道經、寶幢經、寶聚經、寶篋經、彩畫經、高頂王經，如是等大乘經，有百俱胝部黨差別。復有大乘毘柰耶藏、阿毘達磨藏眾多部類，一切皆是菩薩藏攝。復有聲聞三藏，謂素怛纜藏、毘柰耶藏、阿毘達磨

藏。素怛纜藏有五阿笈摩，謂長阿笈摩、中阿笈摩、增一阿笈摩、相應阿笈摩、雜類阿笈摩；毘柰耶藏中，有苾芻戒經、苾芻尼戒經、分別戒本諸蘊差別，及增一律；阿毘達磨藏中，有攝六問相應發趣等眾多部類。復有本生鬘讚、獨覺鬘讚。於如是等正法藏中，或是佛說，或菩薩說，或聲聞說，或諸仙說，或諸天說，或智者說，能引義利，乃至有能於四句頌若自誦，若教他誦，若自讀，若教他讀，若自持，若教他持，若自解說，若教他解說。或於法師恭敬供養，或於經卷恭敬供養，謂以種種香花、幡蓋、伎樂、燈明而為供養；或於經卷，以諸雜綵囊帊縷帶而嚴飾之。由如是等善根力故，至彌勒如來成正覺時，善現人身，於彼佛第二會中，以淨信心捨離家法，出趣非

家，淨除鬚髮，披著法服，既預聖眾，隨宿願力便得涅槃。是名第二為法事故，種善根者所得果報。

若諸國王及臣庶等一切施主，於今釋迦牟尼佛正法中，能為僧事，自種善根，或教他種。謂諸苾芻、苾芻尼眾，或次第請，或隨緣請，於月一日，或月八日，或十五日設齋供養；或往寺中若供養佛、若供養眾；或作給侍；或有供養修靜慮者；或有供養諸說法者；或見有人欲於正法學習流布，從師聽受，不作留難，施其所安，無令怯退；或設五年無遮施會；或施四方僧；或施寺舍及坐臥具；或施鍾磬；或施園林，如是等類供養僧眾。彼由如是善根力故，至彌勒如來成正覺時，善得人身，於彼佛第三會中，以淨信心捨離家法，出趣非家，淨除鬚髮，披著法

服，既預聖眾，隨宿願力便得涅槃。是名第三為僧事故，種善根者所得果報。」

爾時慶友大阿羅漢，為諸大眾廣說如上事已，以神通力，於大眾前身昇虛空，高七多羅樹，示現種種不可思議雙神變事，令所觀眾增進勝道。

時彼尊者現神變已，即於空中結跏趺坐，捨諸壽行及諸命行，入無餘依般涅槃界。先定願力，火起焚身，於虛空中兩身遺骨。時諸大眾悲歎希有，競收遺骨，起窣堵波，以諸香花、寶幢、幡蓋、伎樂、燈明常為供養。

此法住記，古昔諸師展轉相承，誦持不忘。為令一切國王、大臣、長者、居士諸施主等，了達因果，厭生老病死芭蕉幻焰泡沫之身，修諸勝業，於當來世逢事彌勒，解

脫煩惱，得大涅槃，生愛樂故，於佛正法護持建立，令久不滅。

大阿羅漢難提蜜多羅所說法住記

婆藪槃豆法師傳

陳天竺三藏法師真諦譯

婆藪槃豆法師者，北天竺富婁沙富羅國人也。富婁沙譯為丈夫，富羅譯為土。

毘搜紐天王，世傳云：「是帝釋弟。」帝釋遣其出閻浮提作王，為伏阿修羅。其生閻浮提為婆藪提婆王之子。有修羅，名因陀羅陀摩那。因陀羅是帝釋名，陀摩那譯為伏。此阿修羅恆與帝釋鬪戰，謂能伏帝釋，故有此名。《毘伽羅論》解阿修羅，謂非善戲，即應以此名譯之。諸天恆以善為戲樂，其恆以惡為戲樂，故有此名。亦得名非天。

此阿修羅有妹，名波羅頗婆底。波羅頗譯為明，婆底

譯為妃。此女甚有形容，阿修羅欲害毘搜紐天，故將此妹誑之。以呪術力，變閻浮提一處令陰暗，其自居閻處不令人見，令妹別住明處，語妹云：「若人欲得汝為婦，可語云：『我兄有大力，若欲取我，必與我兄相違。若能將我兄鬪戰，乃可相許。』」

毘搜紐天後於明處見此女，心大悅之，問云：「汝是何人？」

答云：「我阿修羅童女。」

天云：「諸阿修羅女由來皆適諸天。我既無婦，汝又無夫。今欲相取，得見從不？」女如其兄先言以答之。

天云：「汝今惜我身，故有此言。汝已愛我，我豈相置。我有大力，能與汝兄鬪戰。」女遂許之，即為夫妻。

阿修羅後往明，問毘搜紐天：「汝云何輒取我妹為婦？」

天答云：「若我非丈夫，取汝妹為婦，可致嫌責。我是丈夫，無婦；汝妹是童女，無夫。我今取之，正是其理，何故見怪？」

阿修羅云：「汝有何能，自稱丈夫。若是丈夫，能將我鬪戰得勝，當以妹適汝。」

天云：「汝若不信，當共決之。」即各執仗互相斫刺。

毘搜紐天是那羅延身，斫刺所不能入。天斫阿修羅，頭斷即還復，手臂等餘身分悉爾，隨有斷處即還復。從旦至晚，斫刺不息，阿修羅無有死狀，天力稍盡，轉就疲

困。若至夜，阿修羅力則更強。明妃恐其夫不如，取鬱波羅華擘為兩片，各擲一邊，明妃於其中行，去而復來。天即解其意，捉阿修羅身擘為兩片，各擲一邊，天於其中得去而復來，阿修羅由此命斷。

阿修羅先就仙人乞恩，願令我身被斫刺，即便還復。仙人施其此恩故，後時被斫刺而不失命。仙人欲令諸天殺之，故不施其擘身還復之恩，故後時由此失命。

毘搜紐天既居此地，顯丈夫能，因此立名，稱丈夫國。

此土有國師婆羅門姓憍尸迦，有三子，同名婆藪槃豆。婆藪譯為天，槃豆譯為親。天竺立兒名有此體，雖同一名，復立別名以顯之。

第三子婆藪槃豆，於薩婆多部出家，得阿羅漢果，別名比隣持跋婆。比隣持是其母名。跋婆譯為子，亦曰兒。此名通人畜，如牛子亦名跋婆。但此土呼牛子為犢長子。婆藪槃豆是菩薩根性人，亦於薩婆多部出家，後修定得離欲。思惟空義不能得入，欲自殺身。

賓頭羅阿羅漢，在東毘提訶觀見此事，從彼方來，為說小乘空觀，如教觀之，即便得入。

雖得小乘空觀，意猶未安，謂理不應止爾。因此乘神通，往兜率多天諮問彌勒菩薩。彌勒菩薩為說大乘空觀，還闍浮提如說思惟，即便得悟。於思惟時，地六種動。既得大乘空觀，因此為名，名阿僧伽。阿僧伽譯為無著。

爾後數上兜率多天，諮問彌勒大乘經義，彌勒廣為解

說，隨有所得，還閻浮提，以己所聞為餘人說。聞者多不生信。

無著法師即自發願：「我今欲令眾生信解大乘，唯願大師下閻浮提解說大乘，令諸眾生皆得信解。」

彌勒即如其願，於夜時下閻浮提，放大光明，廣集有緣眾，於說法堂誦出十七地經。隨所誦出，隨解其義，經四月夜，解十七地經方竟。雖同於一堂聽法，唯無著法師得近彌勒菩薩，餘人但得遙聞。夜共聽彌勒說法，晝時無著法師更為餘人解釋彌勒所說，因此眾人聞信大乘。

彌勒菩薩教無著法師修日光三摩提，如說修學，即得此定，從得此定後，昔所未解悉能通達，有所見聞永憶不忘，佛昔所說華嚴等諸大乘經悉解義。

彌勒於兜率多天，悉為無著法師解說諸大乘經義，法師並悉通達，皆能憶持，後於閻浮提造大乘經優波提舍，解釋佛所說一切大教。

第二婆藪槃豆，亦於薩婆多部出家。博學多聞，遍通墳籍，神才俊朗，無可為儔，戒行清高，難以相匹。兄弟既有別名，故法師但稱婆藪槃豆。

佛滅度後五百年中，有阿羅漢，名迦旃延子。母姓迦旃延，從母為名。先於薩婆多部出家。本是天竺人，後往罽賓國，罽賓在天竺之西北。與五百阿羅漢及五百菩薩，共撰集薩婆多部阿毘達磨，製為八伽蘭他，即此間云八乾度。伽蘭他譯為結，亦曰節。謂義類各相結屬，故云結；又攝義令不散，故云結；義類各有分限，故云節。亦稱此

文為發慧論。以神通力及願力，廣宣告遠近：「若先聞說阿毘達磨，隨所得多少，可悉送來。」於是若天、諸龍、夜叉，乃至阿迦尼師吒諸天，有先聞佛說阿毘達磨，若略若廣，乃至一句一偈悉送與之。迦旃延子共諸阿羅漢及諸菩薩簡擇其義，若與修多羅、毘那耶不相違背，即便撰銘；若相違背，即便棄捨。是所取文句，隨義類相關，若明慧義則安置慧結中，若明定義則安置定結中，餘類悉爾。八結合有五萬偈。造八結竟，復欲造毘婆沙釋之。

馬鳴菩薩是舍衛國婆枳多土人，通八分毘伽羅論，及四皮陀六論，解十八部三藏，文宗學府，允儀所歸。迦旃延子遣人往舍衛國，請馬鳴為表文句。馬鳴既至罽賓，迦旃延子次第解釋八結，諸阿羅漢及諸菩薩，即共研辯義意

若定，馬鳴隨即著文。經十二年，造毘婆沙方竟，凡百萬偈。毘婆沙譯為廣解。

表述既竟，迦旃延子即刻石立表云：「今去學此諸人不得出罽賓國，八結文句及毘婆沙文句亦悉不得出國。」恐餘部及大乘汙壞此正法，以立制事白王，王亦同此意。罽賓國四周有山如城，唯有一門出入，諸聖人以願力，攝諸夜叉神令守門。若欲學此法者，能來罽賓，則不遮礙。諸聖人又以願力，令五百夜叉神為檀越，若學此法者，資身之具無所短乏。

阿綸闍國有一法師，名婆娑須拔陀羅，聰明大智，聞即能持。欲學八結毘婆沙義，於餘國弘通之。法師託迹為狂癡人，往罽賓國，恆在大集中聽法，而威儀乖失，言笑

舛異。有時於集中論毘婆沙義，乃問羅摩延傳，眾人輕之，聞不齒錄。於十二年中聽毘婆沙得數遍，文義已熟，悉誦持在心。欲還本土，去至門側，諸夜叉神高聲唱令：「大阿毘達摩師今欲出國。」即執將還於大集中，眾共檢問，言語紕繆不相領解。眾咸謂為狂人，即便放遣。法師後又出門，諸神復唱令執還，遂聞徹國王。王又令於大集中更檢問之，眾重檢問，亦如先，不相領解。如此三反，去而復還。至第四反，諸神雖送將還，眾不復檢問，令諸夜叉放遣出國。法師既達本土，即宣示近遠，咸使知聞云：「我已學得罽賓國毘婆沙文義具足，有能學者可急來取。」於是四方雲集。法師年衰老，恐出此法不竟，令諸學徒急疾取之，隨出隨書，遂得究竟。罽賓諸師後聞此法

已傳流餘土，人各嗟歎。

至佛滅後九百年中，有外道，名頻闍訶婆娑。頻闍訶是山名，婆娑譯為住。此外道住此山，因以為名。有龍王，名毘梨沙迦那，住在頻闍訶山下池中，此龍王善解僧法論。此外道知龍王有解，欲就受學，龍王變身作仙人狀貌，住葉屋中。

外道往至龍王所，述其欲學意，龍王即許之。外道採華滿一大籃，頭戴華籃，至龍王所，繞龍王一匝，輒投一華以為供養，投一華作一偈讚歎龍王，隨聞隨破其所立偈義，即取華擲外。其隨施所立偈義既立，還投所擲華。如此投一籃華盡，具破教諸偈，悉來就龍王。

既嘉其聰明，即為解說僧法論，語外道云：「汝得論

竟，慎勿改易。」龍王畏其勝已故有此。

及其隨所得簡擇之，有非次第，或文句不巧，義意不如，悉改易之。龍王講論竟，其著述亦罷，即以所著述論呈龍王。

龍王見其所製勝本，大起瞋妬，語外道云：「我先囑汝不得改易，我論汝云何改易？當令汝所著述不得宣行。」

外道答云：「師本囑我論竟後不得改易，不囑我於說論中不得改易。我不違師教，云何賜責？乞師施我恩，我身未壞，願令此論不壞。」師即許之。

外道得此論後，心高我慢，自謂其法最大，無復過者，唯釋迦法盛行於世，眾生謂此法為大，我須破之。即

入阿綸闍國以頭擊論義鼓云：「我欲論義，若我墮負當斬我頭，若彼墮負彼宜輸頭。」國王毘柯羅摩阿祇多，譯為正勒日，王知此事，即呼外道問之。

外道曰：「王為國主，於沙門、婆羅門心無偏愛，若有所習行法，宜試其是非。我今欲與釋迦弟子決判勝劣，須以頭為誓。」王即聽許。

王遣人問國內諸法師：「誰能當此外道？若有能當，可與論義。」於時摩菟羅他諸師，婆藪槃豆法師等諸大法師，悉往餘國不在。摩菟羅他。譯為心願，唯有婆藪槃豆師佛陀蜜多羅法師在。佛陀蜜多羅，譯為覺親。

此法師本雖大解，年已老邁，神情味弱，辯說羸微。法師云：「我法大將悉行在外，外道強梁，復不可縱，我

今正應自當此事。」法師即報國王。王仍剋日廣集大眾於論義堂，令外道與法師論義。

外道問云：「沙門為欲立義，為欲破義？」

法師答云：「我如大海，無所不容。汝如土塊，入中便沒。隨汝意所樂。」

外道云：「沙門可立義，我當破汝。」

法師即立無常義云：「一切有為法，剎那剎那滅。何以故？後不見故。」以種種道理成就之，是法師所說。

外道一聞，悉誦在口。外道次第以道理破之，令法師誦取，誦不能得；令法師救之，救不能得。法師即墮負。

外道云：「汝是婆羅門種，我亦是婆羅門種，不容殺汝。今須鞭汝背，以顯我得勝。」於是遂行其事。

王以三洛沙金賞外道，外道取金，布散國內，施一人。還頻闍訶山，入石窟中，以呪術力召得夜叉神女名稠林，從此神女乞恩：「願令我死後，身變成石，永不毀壞。」神女即許之。其自以石塞窟，於中捨命，身即成石。所以有此願者，其先從其師龍王乞恩：「願我身未壞之前，我所著僧伽論亦不壞滅。」故此論於今猶在。

婆藪槃豆後還聞如此事，歎恨憤結，不得值之。遣人往頻闍訶山覓此外道，欲摧伏其很慢，以雪辱師之恥。外道身已成石，天親彌復憤懣。即造七十真實論破外道所造僧伽論，首尾瓦解，無一句得立。諸外道憂苦，如害己命。雖不值彼師，其悉檀既壞，枝末無復所依，報讐雪恥，於此為訖。眾人咸聞慶悅，王以三洛沙金賞法師。法

師分此金為三分，於阿綸闍國起三寺，一、比丘尼寺，二、薩婆多部寺，三、大乘寺。

法師爾後更成立正法，先學毘婆沙義已通，後為眾人講毘婆沙義。一日講即造一偈，攝一日所說義，刻赤銅葉以書此偈，標置醉象頭，下擊鼓宣令：「誰人能破此偈義，能破者當出。」如此次第造六百餘偈，攝毘婆沙義盡，一一皆爾。遂無人能破，即是俱舍論偈也。偈訖後，以五十斤金，并此偈寄與罽賓諸毘婆沙師，彼見聞大歡喜，謂我正法已廣弘宣。但偈語玄深不能盡解，又以五十斤金，足前五十為百斤金餉法師，乞法師為作長行解此偈義。法師即作長行解偈，立薩婆多義，隨有僻處，以經部義破之，名為阿毘達磨俱舍論。論成後，寄與罽賓諸師，

彼見其所執義壞，各生憂苦。

正勒日王太子，名婆羅祇底也。婆羅譯為新，祇底也譯為日。王本令太子就法師受戒，王妃出家亦為法師弟子。太子後登王位，母子同請留法師住阿綸闍國，受其供養，法師即許之。新日王妹夫婆羅門，名婆修羅多，是外道法師，解毘伽羅論。天親造俱舍論，此外道以毘伽羅論義破法師所立文句，謂與毘伽羅論相違，令法師救之。若不能救，此論則壞。法師云：「我若不解毘伽羅論，豈能解其深義。」法師仍造論破毘伽羅論，三十二品始末皆壞，於是失毘伽羅論，唯此論在。王以一洛沙金奉法師，王母以兩洛沙金奉法師。法師分此金為三分，於丈夫國、罽賓國、阿綸闍國各起一寺。

此外道慚忿，欲伏法師，遣人往天竺，請僧伽跋陀羅法師，來阿踰闍國造論破俱舍論。此法師至，即造兩論，一、光三摩耶論，有一萬偈，止述毘婆沙義。三摩耶譯為義類。二、隨實論，有十二萬偈。救毘婆沙義破俱舍論。論成後，呼天親更共面論決之。天親知其雖破，不能壞俱舍義，不復將彼面共論決。法師云：「我今已老，隨汝意所為，我昔造論破毘婆沙義，亦不將汝面共論決。汝今造論，何須呼我。有智之人，自當知其是非。」

法師既遍通十八部義，妙解小乘，執小乘，為是不信大乘，謂摩訶衍非佛所說。

阿僧伽法師既見此弟聰明過人，識解深廣，該通內外，恐其造論破壞大乘。阿僧伽法師住在丈夫國，遣使往

阿綸闍國報婆藪槃豆云：「我今疾篤，汝可急來。」天親即隨使還本國，與兄相見，諮問疾源。

兄答云：「我今心有重病，由汝而生。」

天親又問：「云何賜由？」

兄云：「汝不信大乘，恆生毀謗，以此惡業，必永淪惡道。我今愁苦，命將不全。」

天親聞此驚懼，即請兄為解說大乘，兄即為略說大乘要義。法師聰明，殊有深淺，即於此時悟知大乘理，應過小乘。於是就兄遍學大乘義，後如兄所解，悉得通達解意，即明思惟，前後悉與理相應，無有乖背。始驗小乘為失，大乘為得。若無大乘，則無三乘道果。昔既毀謗大乘，不生信樂，懼此罪業必入惡道，深自咎責，欲悔先

過，往至兄所陳其過迷，今欲懺悔，先誓未知何方得免，云：「我昔由舌故生毀謗，今當割舌以謝此罪。」

兄云：「汝設割千舌，亦不能滅此罪。汝若欲滅此罪，當更為方便。」

法師即請兄說滅罪方便，兄云：「汝舌能善以毀謗大乘，汝若欲滅此罪，當善以解說大乘。」

阿僧伽法師殂歿後，天親方造大乘論，解釋諸大乘經。華嚴、涅槃、法華、般若、維摩、勝鬘等諸大乘經論，悉是法師所造。又造唯識論、釋攝大乘、三寶性甘露門等諸大乘論，凡是法師所造。文義精妙，有見聞者靡不信求，故天竺及餘邊土學大小乘人，悉以法師所造為學本。異部及外道論師聞法師名，莫不畏伏。於阿綸闍國捨

命，年終八十。雖迹居凡地，理實難思議也。

前來訖此，記天親等兄弟。此後記三藏闍梨，從臺城出入，東至廣州，重譯大乘諸論，并遷化後事傳於後代。

婆藪槃豆法師傳